

Henrici Augusti Wrisberg phil. et med. doct. ... sylloge commentationum anatomicarum. I. De membranarum ac inuolucrorum continuationibus. II. Neruis arterias venasque comitantibus et III. De neruis pharyngis.

Contributors

Wrisberg, Heinrich August, 1739-1808.
Royal College of Surgeons of England

Publication/Creation

Goettingae : Apud Joann. Christ. Dieterich, 1786.

Persistent URL

<https://wellcomecollection.org/works/qvbbd399>

Provider

Royal College of Surgeons

License and attribution

This material has been provided by The Royal College of Surgeons of England. The original may be consulted at The Royal College of Surgeons of England. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

HENRICI AVGVSTI WRISBERG

PHIL. ET MED. DOCT.
CONSILIARII AVLICI REGII ET ELECTORALIS
MEDICINAE ET ANATOMIAE
IN UNIVERSITATE GEORGIA AVGVSTA PROFESSORIS PUBLICI ET ORDINARII
SOCIETAT. REG. SCIENT. GOETTINGENS. MEMBRI

(2)

S Y L L O G E
COMMENTATIONVM
ANATOMICARVM

I.

de membranarum ac inuolucrorum continuationibus


II.

neruis arterias venasque comitantibus

ET

III.

de neruis pharyngis.



GOETTINGAE

AFFVD JOANN. CHRIST. DIETERICH.
MDCCCLXXXVI.

Digitized by the Internet Archive
in 2016

<https://archive.org/details/b22288715>

ILLVSTRI DOMINO

DOMINO

ANTONIO SCARPA

IN TICINENSI UNIVERSITATE LITTERARVM

ANATOMES ET CHIRVRGICARVM OPERATIONVM

PROFESSORI CELEBERRIMO

REGIAE SCIENTIAR. ACADEMIAE BEROLINENSIS

CAESAREO LEOPOLD. NAT. CVRIOS.

ET REG. MEDIC. PARISIENS. SODALI

VIR O
ERUDITISSIMO INGENVO
ET PLVRIVM NOVARVM IN ARTE ANATOMICA VERITATVM
INVENTORI SAGACISSIMO FELICISSIMOQUE

FAVTORI SVO ET AMICO
OMNI HONORIS AMORIS ET REVERENTIAE
CVLTV PROSEQVENDO

HAS COMMENTATIVNCVLAS

PIE

OFFERT FOVET CONSECRAT

HENR. AVG. WRISBERG

ANATOMICVS GOETTINGENSIS.

HENR. AVG. WRISBERGII D.
C O M M E N T A T I O
DE
MEMBRANARVM AC INVOLVCRORVM
CORPORIS HVMANI
CONTINVATIONIBVS
PARTIM DVBIIS PARTIM VERIS.

P R A E L E C T A N O V . M D C C L X X X I I .

§. I.

Corporis humani et omnium animantium fabrica ita comparata est, ut multiplices eiusdem functiones et munera, multiplicem organorum apparatus postulent, quorum varia nomina, dum *cartilaginum*, *ossum*, *musculorum*, *aponeurosum*, *tendinum*, *ligamentorum*, *viscerum*, *glandularum*, *vasorum*, *neruorumque* appellatione apud anatomicos insigniuntur, totidem quoque anatomiae partes et capita constitunnt. Omnes hae partes suis cum specialibus et propriis, tum vniuersalibus et communibus cinguntur inuolucris, quorum fabrica et usus, origo et mutationes, natura, genius, indoles et vicinitates tot tantasque inter se differentias oculis offerunt, vti ex comparatione pleurae, pericardii et peritonaei, cum membrana pituitaria

B

narium

narium, mucosa faucium, laryngis et pulmonum, cum tunica villosa intestinorum, cystidis felleae, vteri et viarum vrinae patet: sensim tandem omnes organicae partes membranis suis cinctae vnico velamine comprehenduntur, quod *cutis* nomine omnibus cognitum est.

§. 2.

Commode, et ipsa natura quasi duce, quicquid inuoluci nomine insignitum est, et munere velandi fungitur, in duas classes dispesci poterit.

1) Alia enim inuolucra integras corporis cingunt cavitates, et plerumque visceribus earundemque cavitatibus suas tunicas et membranas largiuntur: *Vniuersalia* seu si maiis *communia* vocantur. Referimus ad hanc classem *cutem* ipsam, procul dubio maxime vniuersale corporis integumentum, quo non vna tantum cava, sed tota corporis compages a vertice ad calcem obtegitur. Comprehendit quoque haec classis *duram piamque quodammodo meningem, pleuram, peritonaeum*; cum omnibus vasorum viscerumque integumentis, quae ex his inuolucris in qualibet cavitate oriuntur.

2) Alia vero inuolucra ita comparata sunt, vt vnico tantum visceri aut parti inferuant. Congerimus in hanc alteram classem *cerebri, oculorum, lienis, renum, testiculorum tunicas, et perioslea*. His vero *specialibus integumentis* praecipue competit, vt ex alio inuolucro huic vel illi cavitati communi originem non ducant, nec in alias tunicas continuentur.

Remouemus vero et excludimus plane a nostrae disquisitionis themate, partim tunicas diuersas quae peculiaria organa vi fabricae suae ingrediuntur et constituunt, vti tunicas musculares intestinorum, vesicae, cystidis felleae, vesicularum seminalium, vteri membranacei brutorum quorundam, partim imaginaria nonnullarum partium inte-

integumenta, quae cellulosa vicinae adscribenda sunt, vti pleraeque tunicae glandularum saliualium et lymphaticarum, itemque corporis thyroidei, thymi, capsularum suprarenalium et prostatae, quibus omnibus absque vlla ratione glandularum nomen datum est, nec non fere plerorumque musculorum, quippe qui nullo alio obteguntur velamine, quam tela cellulosa laxiore, vinculum commune omnium partium repraesentante, et musculos cum musculis, hosque cum vasis et neruis coniungente. Medium quodammodo locum inter vera haec inuolucra supra enarrata, et pseudo membranas, quas paullo ante recensuimus, occupant *aponeurotiae* quibusdam in locis expansiones, quae integumentorum instar inferuire nonnullis partibus videtur. Referrem huc *galeam capitinis dictam* quam minus recte frontalis et occipitalis musculi tendineam esse expansionem putant: Reftorum musculorum in abdomen vaginam, manifeste a tendineis obliquorum expansionibus originem ducentibus: Aponeuroses cubiti crurisque musculos obtegentes, nec non volae plantaeque superinductas, quibuscum biceps brachii, tensorque fasciae latae, palmaris plantarisque musculi inferuntur, vt tendi adducique eo commodius earundem fibrae queant.

§. 3.

Antiquioris nunc et recentioris aeui monumenta testantur, originem diuersorum corporis animati inuolucrorum, tum internorum cum externorum, ex aliis deducendam esse. *Durae cerebri matri et cuti* prae aliis id attributum competere putabant veteres, vt reliquas membranas ceu matres gignerent. Forsan denominandi ratio vt in cerebri integumentis matrum nomen receptum sit, inde deduci potest. Ita minime dubitabant, duram meningem, dum cranii varia foramina et fissuras egrederetur, medullaeque spinalis conceptaculum derelinqueret, vtut neruos concomitaretur, sic pariter omnium ossium inuolucrum formare. Quid quod parum absuit,

quin omnes cavitatum reliquarum ut thoracis et abdominis membranas, pleuram puta et peritonaeum, ex eodem fonte deriuarent. Facile omnino est, in hunc errorem delabi, qui obiter tantum considerauerit, periorbitam in foramine optico et in tota fissura sphenoidali superiore cum dura meninge ita cohaerere, ut una ex altera enata esse videatur. Sic pariter in fissura spheno-maxillari. Redibimus vero in veritatis tramitem, si caute exemptis oculi partibus periorbitam ab ossibus soluimus, et eandem resecto superiore orbitae tegmine vsque ad fissuras et opticum foramen prosequimur, quo tandem appareat, non colore solum et compage periorbitam a dura matre differre, sed non obstante arctissimo vinculo crassiusculo quodam limite separari, contiguas igitur esse membranas, continuas minime. Idem fere hic error subrepit, qui multis imposuit, sclerotica durioris nerui optici inuolucri esse continuationem, et corneam a mutata tantum sclerotica oriri, licet autopsia uti hanc sic et illam opinionem falsam esse ostendat.

Diu sustinuit aluitque hunc antiquitatis errorem, quod dura mater etiam internum cranii periosteum appellatum fuit, a quo itaque iusta praesumptione reliqua ossium inuolucra deducenda esse existimauerunt. An insipidius quidquam ac insulsius cogitari possit ignoro. Eo in loco ossa periosteo interno indigent, vbi interior eorundem superficies est, in cavernulis puta et cancellis maioris minorisque amplitudinis, in diploe itaque, si de cranii ossibus sermo est. Ibi omnino et cranii ossa suum periosteum internum habent, nunquam vero a dura meninge ortum trahens.

§. 4.

In plerisque partibus, nisi in omnibus, luce meridiana clarius iam ostensum est, ostendi faltem potest, inuolucrum earum nullibi ex alia membrana deriuari posse. Sed fibimet ipsis proprium

prium esse, naturaque, usu et fabrica, plane ab aliis differre. Si de ullo alio viscere, musculo, parteque cum certitudine id afferere auderem, de oculi tunica externa *sclerotica* nempe et *cornea*, de *choroidea* itidem, de *periosteis*, de *rene*, *splene*, *testiculo* et *epidymide* id quidem omnino verum est propria possidere inuolucra. Autopsia enim docet nihil plane scleroticae commune esse cum durae matris in nero optico propagine, nimis manifesto fine choroideam ingredientibus retinae fibrillulis adhaerere, licet diu multi sat celebres viri antiquum errorem amplexi fuerint. Nec minori euidentia constat, periosteal cuilibet ossi et cartilagini propria esse, et prout ex uno osse nunquam in aliud articulationes supergrediendo transeunt, sic ex alio inuolucro nunquam oriri. Renum situs extra peritonaei cauum tam luculenter comprobatus, ut de inuoluci horum organorum ex peritonaeo ortu ne somniari ullus possit. Cum aliqua veri specie de lienis membrana extima ex peritonaeo producta iudicium ferri possit, cum tam manifeste omentorum maximum, lienem reuinciat. Repugnat autem 1) obseruationibus, fere unquam continuari super splenem omentum posse: 2) Robustior huius membranae super liensem habitus, omentorum vero teneritudo summa: 3) Pinguitudinis ut plurimum tanta in omentis pinguibus copia, et in splene plenaria absentia: 4) Parcior vasorum numerus in splenis tunica, vasculosior omentorum e contrario natura. Quem tandem tunicae vaginalis in albugineam testis et epidymidis implantatio in eam opinionem trahere valet, ut albugineam vaginalis tunicae continuationem esse existimet, ille probe perpendat, laxe modo testem a vaginali tunica inuolui, et cum ipsi testi adhaeret, imperceptibiliter sensim extenuari, et super albugineam ita duci, ut exteriorem quidem albugineae tunicam efformare videatur, sub qua tamen crassa tenax et splendens propria albuginea delitescit.

§. 5.

Eadem vero cum veritate demonstrat accuratior anatome, multarum, quin plerarumque partium inuolucra ex aliis membranis matrum instar procreari iisdemque obduci. Quodlibet maiorum cauitatum peristroma, vasis visceribusque contentis fere omnibus, paucis modo exceptis, exterius velamen largitur. Cranii dura membrinx neruis cum caluariam tum dorsi spinam egredientibus vaginam suppeditat, per vniuersum corpus secum ducendam; venarum iugularium internarum autem truncos ex fossa iugulari descendentes, intactos relinquit. Pleura nimis manifeste pericardio, pulmonibus vasisque cordis et pulmonum maioribus, externam tunicam tenerissimae propaginis instar impertit, oesophagum etiam per posteriorem pleurae duplicaturam ad diaphragma migrantem per maximam itineris sui partem laxissima et mollissima cellulosa amplectitur, ut si plexus neruorum oesophageos praeparare velis, pleurae hoc inuolucrum remouendum sit.

Exiguum modo huius canalis frustulum pleura a diaphragmate in posterius mediastinum abeunte perfecte obducitur.

Plerisque antiquitatis auctoribus iam notum fuit, a peritonaeo omnia in abdomen comprehensa viscera tunicas suas obtinere. De multis quin plurimis asseri id potest, de omnibus minime. Immediate a peritonaeo obteguntur interior vesicae vrinariae pars abdomini obuersa, maxima vteri pars, anterius intestini recti segmentum, diaphragma, abdominalium musculorum, si ita volumus, interior superficies cum psoadibus et iliacis internis. Mediantibus mesenterio et mesocolo, tenuibus aequre quam crassis intestinis extimam tunicam dat, quin eandem etiam super ventriculum dicit. A diaphragmate reflexum ope ligamentorum ita dictorum hepati prospicit, et sic sensim pededentimque in omenta mutatur. Renes, capsulas,

psulas, pancreas, vasa sanguifera maiora, spermatica, vrinales et feminales ductus supergreditur, sed praeter cellulosi quidquam, peculiari tunica has partes non amplectitur. Cum lienis membrana, licet hoc viscus peritonaei cauo contineatur, nihil commercii habet, nisi quod omentum maius in multis cadaueribus lienii adhaerescat. Supersunt variae peritonaei continuationes aliquantisper adhuc controuersae, vt tunica vaginalis funiculi spermatici, vasorum cruralium vagina &c. impraesenti a nobis non rimandae.

§. 6.

Conaminum, captorumque ab eruditis periclorum de membranarum continuationibus et inde collectarum veritatum numerum legentibus et perscrutantibus, cum raritas talium disquisitionum tum non satis congrua et ad satisfaciendam curiositatem idonea enodatio omnino in mentem veniet. Tantoque magis animaduertendum est, a GALENI iam epocha, qui, vt pluribus in anatome subtiliore, pro subsidiorum sui temporis caritate, omni cum industria operam dedit, etiam hanc rem non plane intactam reliquit, paucos ex instituto hunc laborem recudisse, et non aliorum asserta modo recoquendo, quod multi fecerunt, sed pro rei dignitate et grauitate per omnia corporis loca ad naturae archetypum denuo scrutando et inuestigando, in veram communicationis membranarum rationem inquisiuisse, vt omne dubium remoueretur, et veritas luce meridiana clarius in apricum poneretur. Praestiterunt equidem varii cordati et de eruenda veritate solliciti viri multum. RVISCHIVS, b. KAWBOERHAAVE, cuius merita in scrutandis pleurae diuerticulis ipse b. HALLERVVS magni fecit: ALBINVS, GAVBIVS, de GORTER, LVDWIGIVS, HVBER, ill. CAMPERVS, MORGAGNI, CALDANVS, MOSCATI et MVRRAY in inuestiganda fasciae latae productionibus. Omnibus vero palmam praeripuit ill. BONN Amstelodamensis diligens et ingeniosus incisor, qui in iuuenili equidem aetate, masculo et maturo opere multum lucis

lucis sparsit a). Enoluens thesauros, quos anatomicorum et practicorum debita anatomies cognitione instructorum industria reliquerat, non potui non annotare, diuitem in hac re nondum exhaustam esse naturam, aduersariaque mea perambulans facile animaduerti, exoptatam obseruandi occasionem quaedam mihi suppeditasse, cum incisoris artificio elicita, tum morborum effectibus producta, quae arti anatomico-physiologicae non modo, sed ipsius praxeos medicae exercitio utilia esse possent, eaque Societatis nostrae annalibus inferere decreui.

§. 7.

Vt vero iam per se, ei qui de veritate structurae animalis corporis follicitus est, haec disquisitio grauis et maximi momenti esse debet, sic utilitatem anatomicae huius disquisitionis meditanti, non facile elabi potest insignis illius scrutinii influxus, cum in perspiciendis et dijudicandis multis in fano statu phaenomenis, tum in dirigendis et administrandis pro diuerso labefactatae machinae humanae statu medela et consiliis. Vt pauca modo illustrandi adducam argumenta, neminem latebit; 1) ex simili inuolucrorum structura et indole, pendere similem liquoris ibidem secreti naturam, nam liquores vaporum instar in cauo durae meningis, pleurae, pericardii, peritonaei, tunicarum vaginalium, et diuerticularum Nuckii collecti, similem perfecte indolem et naturam seruant, quam etiam retinent, si in verum hydropem magna illius copia collecta fuerit. Sic b. HALLERV^s b) iam olim aliqualem partium consensum ex simili membranae continuatione deduxit, et minime infrequens est, loca corporis maxime diffusa, vberiorem liquoris prouentum offerre, si membrana similis naturae obducuntur. Saepe enim animadvertisimus in catarrhalibus affectibus, si fauces pulmonesque mag-

nam

a) *Dissert. de Continuationibus membranarum.* Lugd. Bat. 1763.

b) *Prim. lin. Physiol.* §. 568.

gnam muci copiam fundunt, similem muci secretionem naturali maiorem ex vrethra et vagina contingere, sine venerea contaminatione praegressa.

2) Morborum sedes et cognitio; symptomatum inde pendentium gradus, vigor et vehementia; medelae administranda delectus, tempus, iudicium, natura, genius, indoles et ratio omnino a rimata et probe perpensa membranae affectae partis ab alia continuatae consideratione pendent. Potest morbus inflammatorius in parte ortum capere, e. g. in pleura, vbi ab initio mali nihil periculi metuendum, neglecto auxilio ob continuationem membranae, quae pericardium pulmonesque inuestit, his semel aggressis, cito symptoma grauiora et peiora redduntur, aegerque ipse in vitae incidit periculum.

§. 8.

Pectoris viscera iam primum perscrutabimur. Pleurae, thoracis caua obducentis, naturam, ad viscera thoracis relationem, et eiusdem super alias partes continuationem tam erudite, concinne et docte descripsit b. KAW-BOERHAAVE c), vt pauca noua addi posse videantur. Pleura enim in vtroque sacco, derelicta omni thoracis et superficie pectoralis circumferentia, quibusnam in locis firmissimam habet ad costas et periosteum thoracis adhaesionem, sub sterno sese demergit ad pericardium, in quo descensu vterque pleurae foccus ad se inuicem accedit, relicto inter sternum, et locum vbi pleurae sese contingunt, cauo longo irregulariter triangulari, quod *Mediastrum anterius* appellant, bene a magno incisore b. HVBERO d) descriptum

c) *Perspiratio dicta Hippocrati per uniuersum corpus anatomice illustrata.*
Leidae. 1738. p. 68. sq.

d) *Progr. observationes anatomicas,*
et inter eas descriptionem septi cerebri lucidi, pleurae, et mediastrinorum sistens.
Cassellis., 1760. p. 26. sq.

scriptum. Similiter ab inferiore seu posteriore regione super corporibus vertebrarum thoracicarum bini pleurae facci pericardium pariter petunt, et relicto inter se *Mediastino posteriore* simili modo posteriorem pericardii partem tenella sui continuatione obducunt, vti in anteriore parte pariter factum est. Certissime igitur pericardii lamina extima vera pleurarum continuatio et quasi filia est. Omnes itaque pleurae inflammationes super pericardium progrediuntur, hoc simili modo afficiunt, et dolorifica symptomata excitant, vt medico non adeo facile sit, in inflammationibus thoracis internis semper certo determinare, quae partes affectae et ab inflammatione prehensae, quae liberae sint et immunes. Secui cadauera morbis inflammatoriis thoracis extincta in quibus iniectionis artificium vt subtilissima pleurae vasa, sic elegatissimum vasorum rete in vtraque pericardii superficie ex pleurae vasis continuatum visibile reddiderat. Vidi pus sicuti inter pleuram et intercostales musculos, pleuram inter et diaphragma in mediastinis effusum, ita pariter inter pericardium et pleurae super illud continuationem haerens, pericardii cauo ipso fano et naturali. Nunquam vero hanc pleurarum super pericardium productionem evidentius, absque omni adhibita incisoris industria cernere potui, quam in infante 5 annorum atrophicō, qui Octobri 1776. absque hydropis cuiusdam manifesto indicio phthisi interemptus est neruosa. Aperto thorace dextro multum feri profluebat, hydropis pectoris quo occulte infans laborauit indicio. Cum omnia cadauera hydropica propter varias rationes accuratius a me examinantur, suspensa manu etiam sinistrum pectus aperui similem liquorē fundens. Costis vtriusque thoracis reclinatis bina mediastina admodum in tota longitudine distenta vidi, in quibus magna liquoris copia fluctuabat, pericardium autem ultra duplum naturalis suae magnitudinis distentum esse videbatur. Perforato mediastino anteriore insignis feri pellucidi copia profluebat, quo effuso simul capacitas et volumen pericardii minuebatur, et postquam pertuso posteriore

riore mediastino liquidum contentum efflueret, pericardium talem in modum collapsum est, ut naturalem magnitudinem recuperauerit. Accuratiore dein examine instituto euidenter obseruaui, pleurae super pericardium productionem aquam comprehendisse, qua mediastina simul distenta visa sunt.

§. 9.

Constantiam et ordinem, quem natura in obducendis et velandis visceribus ope illius inuolucri quod cavitatem viscera comprehendens obducit, sequitur, etiam confirmatum vidi in eleganti specimine foetus, cuius hepar, ventriculus et lien per hiatum notabilem diaphragmatis in thoracis cauum sinistrum, deficiente sinistro pulmone, delapsa erant. Peritonaeum enim ex quo pleraque infimi ventris viscera suas tunicas nanciscuntur, per septi transuersi hiatum cum iisdem visceribus in thoracem migrauerat, eademque obducebat, pleura vero suum pulmonem dextrum et pericardium velabat, ita quidem ut duo haec inuolucra sese quidem tangerent, nullibi vero inter se miscerentur. Sic pariter in affectione rarius sane observata, *hernia nempe pulmonis dextri*, qualem in infante 15to d. 19. Octobr. 1782. a natuitate die defuncto intueri mihi licuit, elegantem pleurae ultra thoracis limites continuationem vidi. Deerat in dextro thorace integra costa prima; per amplum igitur illum hiatum, vel iam ante inchoatam respirationem in utero, vel post partum, quod sane difficile erit enodare, saccus pleurae dexter ad pugni magnitudinem ultra thoracis ambitum protrusus et in elasticum resistentem sub inspiratione duriorem, sub exspiratione vero paullo molliorem tumorem eleuatus erat. Post mortem vitium conformatioonis euidentius in conspectum veniebat. Vera enim pleurae ad medium colli altitudinem continuatio et expansio, pulmonis dextri superiorem lobum continens cernebatur, quae laxo cellulosae contextu cum vasibus, nervis musculisque colli connectebatur.

Pleuram a pericardio reducem et super vasa cordis reflexam extimam deinceps pulmonum tunicam formare, omnibus in his laboribus versatis notissimum est.

§. 10.

Pericardium, cor cum truncis vasorum magnis comprehendens, separatum et vnicum cauum ex peculiari et propria membrana solida firmaque factum formare, pariter res notissima est. Pauca igitur tantummodo de singularibus huius receptaculi appendicibus, et de habitu et relatione eiusdem ad vasa cordis maiora et cor ipsum ex aduersariis nostris adiiciemus.

In pericardio cadaueris feminae 45 ann. d. 7. Mart. 1778. memorabilem vidi processum vel appendicem, qui descriptione aequa quam delineatione, si tempus id concessisset, dignus mihi omnino videbatur.

In cadauere ipso viscera thoracis sequentia offerebant symptomata:

- 1) Pulmones plerisque in locis pleurae, diaphragmati et pericardio firmiter accreuerant.
- 2) Magnum, in proportione statura cadaueris, cor et pericardium, quod vti etiam caua pleurae notabilem copiam feri continebat.
- 3) Pulmones caeterum fani nec ullo visibili vitio correpti, sanguine autem vascula tenella uberioris repleta.

Ipsiis appendicis structura praecipua obseruationis momenta suppeditauit.

- 1.) Ex sinistro pericardii admodum distenti latere, versus lobum infimum sinistri pulmonis exibat paullo infra medium pericardii diametrum.

diametrum, canalis digiti minimi crassitie, et oblique versus inferiorem pulmonis marginem, et diaphragma continuabatur.

- 2.) Pollicis longitudinem hac ratione dicta crassitie progressus canalis sensim dilatatur, et in saccum amplum 3 circiter pollices longum, et i cum dimidio latum, et si perfectissime aere repletus est, ultra pollicem et dimidium crassum mutabatur.
- 3.) Si in summo inflationis statu inspiciebatur foccus, multum similitudinis habebat cum sinu cordis et auricula annexa sanguine turgido. Constatbat enim foccus ex ampio et aequali cauo, quod versus inferiora in cornu quoddam extenuabatur auriculae instar, et hoc modo finiebatur.
- 4.) Annexus erat hic pericardii processus margini inferiori lobi pulmonis tertii sinistri, et breuissima et strictissima cellulosa eidem accreuerat, vt primo aspectu putares ipsum saccum non veram pericardii continuationem esse, sed canalem in tunicam externam pulmonis continuari. Absque opera vero difficulti totus foccus a pulmone separabatur et veram pericardii continuationem esse apparuit. In inciso et aperto pericardio praeter maiorem huius amplitudinem nihil nec in corde nec in vasis praeternaturalis mutationis animaduertere licuit.

Quod pericardii, vasis cordis maioribus adhaerentis, continuationes et productiones attinet, omnes obseruationes eo redeunt, vt maxima huius membranae pars a vasis reflexa super cordis caua sinus nempe et ventriculos continuetur, eorundemque tunicam externam constituat. Nam si in cadasueribus in naturam continuationis inquiritur, quorum vasa pericardiaca teneriora liquore idoneo perfecte repleta sunt, aut si examen in talibus institutum fuerit subiectis, qui morbo quodam thoracis acuto extincta sunt, et soluto cauta manu pleurae velamine, pericardium vel ab arteria aorta,

vel pulmonari, vel ab aliqua maiori vena attento oculo remouemus, et dissecta intermedia breui et stricta tela cellulosa auferimus, manifeste apparet, exteriorem pericardii lamellam, quae vero ipsa illius cellulosa est, cuius ope cum pleura cohaerebat, super vasa, et illorum ramos in decursu continuari, et in contextum cellulosum, qui eorundem tunicam extimam efficit et constituit, degenerare. Lamina autem pericardii interior, quae, cum nihil fere ad obuelanda vasa in progressu illorum amiserit, integrum quasi pericardium adhuc est, certissime versus interiora, i. e. versus truncos vasorum, quae inter eos et pericardium, in cauo pericardii ipso haerent, reflectitur, et vasis illis obductis ad cor recurrit, et tunicam cauorum cordis, sinuum nempe cum auriculis, et ventriculorum propriam et extimam efficit.

Melius sane haec vera pericardii ad cor ipsum eiusque vasa maiora relatio cerni et distingui nequit, quam si ventriculum cordis aorticum vel sinistrum cum arteria aorta longitudinaliter perscissum lustramus, sub hac enim encheiresi non solum diuersus vasorum color, albicans magis in illa vasorum parte, quae pericardio obtigitur, pallidus vero supra pericardii adhaesione, sed recuruatam praecipue pericardii versus cauum eiusdem directionem eleganter notare possumus, et quomodo exterior cellulose lamina super vasa continuata, cum cylindro vasorum triangulare spatium relinquat. Immediatus dein pericardii super cor progressus, derelictis vasis, dubitationi nullum praebet locum, vt adeo ipsa teneriora pericardii vascula simul ad cor progrediantur.

§. II.

Peritonaei, infimum ventrem ab interioribus obducentis, super pleraque huius caui viscera progressum et veram continuationem am supra vt veram indubitatam et cognitam exhibui e). Nec minus

e) §. 5. 6.

minus veram eiusdem membranae in tunicas vaginales et Nuckii diuerticula productionem et elongationem, multis dubiam et ambiguam visam, pariter euictam dedi^f). Cum vero ab illo tempore, quo has publici iuris feci disquisitiones, repetitis vicibus eandem nouis accessionibus confirmatam viderim, minime superfluum erit, praecipuas illarum obseruationum addere.

Obs. I.

Junio 1782 cadauer pueri $4\frac{1}{2}$ annorum, in utroque latere notabilem tumorem ab inguine in scrotum descendenter offerens, mihi tradebatur. Congenitum per utrumque annulum ramicem videns, omni industria adhibita, vasa in sectione repleui, ut tanto melius, securius et euidentius peritonaei immediata in tunicas vaginales vasorum spermaticorum elongatio et continuatio quinceretur.

Praeparato itaque in utroque latere annulo, cuius vasa sanguifera materie ceracea in venis aequa quam arteriis bene turgida cernebantur, tantam vidi hiatus amplitudinem, ut bini digiti satis commode in cauum abdominis intrudi possent. Aperto dein sectione transuersali infra umbilicum abdomine, ut ea lineae albae pars, quae ab umbilico ad pubem descendit illaesa maneret, peritonaeum caute ab ambitu interiore musculorum abdominalium inferioris partis solui et remoui ad vesicam vrinariam usque. Evidenter iam peritonaei infra marginem transuersalis musculi in tunicam vaginalis progressum immediatum notaui, obliquum minorem autem reuera perforauit in utroque latere, ut teneri adeo fibrarum muscularium fasciculi, cremasterem formantes ultra $\frac{2}{3}$ tunicam vaginalis amplectentur. Hoc modo formatus peritonaei processus per annulum obliqui maioris abdomen egrediebatur, in dextro latere partem

^f) In *Observationibus anat. de testiculorum ex abdomine in scrotum descensu* et in *Diff. de Peritonaei diuerticulis qui a Nuckio ita dicuntur.*

tem tenuum, in finistro autem cum portione tenuis intestini simul omenti partem comprehendens. Praecipuum autem huius obseruationis momentum fuit, quod rete illud tenellorum vasculorum, quod ex vasis epigastricis ea in regione peritonaeo impertitur, eleganti continuatione ex parte peritonaei abdominali in tunicam hanc vaginalem progrederetur.

Obs. II.

Semel tantum mihi contigit abhinc inter tot cadauerum humanorum extispicia herniam femoralem non mediocris magnitudinis anatomico oculo examinandi. Mense Febr. 1780 in cadauere masculino mendici 50 circiter annorum tumorem magnitudinis pugnae infra ligamentum Fallopii dextri cruris animaduerti, cum mihi tunc vas a huius cadaueris cera replendi opportunitas deesset, recenti in statu sub cautissima partium administratione in naturam herniae huius cruralis inquisiui. Praeparatis itaque ante omnia partibus externis, remotaque cute, fascia lata et contextu cellulofo necente, saccus herniae satis accurate medium locum inter musculum sartorium et gracilem occupauit, et aliquantis per latiore sua expansione pectinaceum obtegebat, vasa neruique huius regionis latera tumoris occupabant, et maioribus arteriae nempe venaeque crurali et saphaeinae, vti etiam neruo crurali incumbebat, ita quidem, vt, si urgente necessitate operatio administranda fuisset, absque omni periculo institui potuisset, nam teneriores venae epigastricae externae et nerui inguinalis surculi nullius momenti erant. Hiatus sub ligamento Fallopii per quem hernia facta fuit fere 2 poll. longus et integrum poll. latus erat, pars autem prolapsa iam dudum cum facco firmissime coaluerat. Facta iam in abdomen incisione et peracta peritonaei a musculis solutio, manifesto vidimus peritonaeum absque omni ruptura perpesta per arcum ligamenti Fallopii ad superiorem femoris regionem delapsum esse, quam prolongationem dein-

ceps

ceps pars intestini tenuis cum frustulo omenti sequuta, successu temporis cum sacco herniae concreuerat.

Persciffo tandem arcu ligamenti, vt saccum cum suis contentis in abdomen reclinare possem, animaduerti, cellulosam peritonaei externam vasa neruumque cruralem tanquam vaginam concomitatum esse, et certe in hoc subiecto cautissimam, nec sane omni periculo carentem requisiuisset administrationem, si remoueri a subiectis vasis neruisque foccus debuisset et ligari.

Obs. III.

Denuo iterum mense Sept. 1783. in cadauere puellae 7 annorum vidi elegans diuerticuli Nückiani specimen in dextro latere. Hiatus ex abdomine vsque in labium pudendum illius lateris integrum digitum recipiebat, nihil autem praeter liquoris quidquam continebat, pars intestinorum vicina facili negotio in canalem pelli et reduci potuit. Forsan hoc saepius contigit. Continuatio peritonaei in hoc diuerticulum vti in omnibus aliis casibus fuit euidentissima.

§. 12.

Quandoquidem iam omnes incisorum obseruationes et animadversiones eo redeunt, visceribus et partibus extra peritonaeum sitis, vti renibus et capsulis, neruis, vasibus majoribus sanguiferis et vreteribus, vesiculis seminalibus et canalium deferentium ductibus, tunicas et inuolucra non subministrari, nihilo minus tamen omnes oper contextus cellulosi, vias et receptacula seminis excipere debemus, cum peritonaeo reuinciuntur, et quaedam adeo partes, vti funiculus vasorum spermaticorum, tantam huius cellulosae quantitatem a peritonaei posteriore superficie secum adducit, vt peculiare inuolucrum, tunicae vaginalis funiculi spermatici nomine, inde formetur: Ner-

D

vus

vus etiam intercostalis in suo per abdomen in peluim descensu tam arcte ope similis cellulofae cum peritonaeo cohaeret, ut difficulter solui ab illo possit. Inde procul dubio pendent funesta saepe illa symptomata, quae affecto peritonaeo mediante neruo intercostali s. sympathetico maximo feso per vniuersum corpus diffundunt: prouti sane de inflammationum in infimo ventre, cum respectu sedis, tum ratione effectus eadem annotatio vera est, cuius supra occasione pleurae mentionem fecimus, ex continuatione peritonaei super alia viscera, inflammationis progressum in aliis visceribus locum omnino habere posse.

* * *

Quid de membranarum interiora loca narum, faucium, laryngis, meatus auditorii, oesophagi, totiusque tractus intestinorum, vaginae, vteri et vrethrae obuestientium ex cute originibus statuendum sit, specialiori commentationi reseruatum est.

HENRICI

HENRICI AVG. WRISBERGII
 OBSERVATIONES ANATOMICO - PHYSIOLOGICAE
 DE
**NERVIS ARTERIAS VENASQVE
 COMITANTIBVS**

§. I.

*Neruorum in vasa influxus, assertus et
 denegatus vicissim.*

HALLERI verba, elegantem suam propriam *de neruorum in arterias imperio* theoriam refellentia, quam cum in Commentariis ad Boérhaavium, tum paullo post in egregia Dissertatione proposuerat, perlegendi, et difficultatem explicationis in re tanti momenti expendenti, minime indifferens esse potest summi Viri prolatum iudicium. Ut enim ipse cum magna argumentorum copia, persuasionis valore *narrationis flumine* et facundia, tum obseruationum anatomicarum vbertate, studio et applicatione verisimiliter ostenderit, neruorum circa vasa plicatorum laqueos, mox stringendo, mox vicissim relaxando tantas et saepe tam stupendas in corpore excitare mutationes; sic paullo post ex nimio irritabilitatis amore, et pro nimia in eam stabiliendam et propugnandam proclivitate “totam hanc deferuit laqueorum theoriam, (sunt ipsius viri immortalis verba), ab anno 1752 in secunda sectione commentarii de partium sensibilitate. Ut enim probabilis

D 2

„videri

„videri possit, repugnat certiori phaenomeno, nerui nempe, dum „musculum in motum ciet, perfectae quieti.”

Cedere itaque debuit hypothesis alii: an probabiliori? an naturae magis consentaneae? Dudum omnino et summo cum iure dubitarunt, stringendi vim in partibus omnibus corporis humani irritabilitati adscribendam esse, quae visibilem oscillationem, crispatiōnem et palpitationem particularum ostenderet. Quot sane motus manifestissimi in corporibus viuentibus cum animalis tum vegetabilis naturae contingunt, absque omni sensibus percipienda partium abbreviatione, aut vlla longitudinis imminutione? Fefellit procul dubio magnum virum laqueorum ansarumque neruearum circa arterias circumuolutio, qualem in subclavia arteria dextri lateris et aorta descendente vterque recurrens ex octauo, et circa art. thyreoideam inferiorem et subclaviam in vtroque latere intercostales nerui in ganglia ceruicalia media et infima abituri formant. Talium sane ansarum plures, dictis longe maiores fortioresque, in chiasmate neruorum brachialium, axillarem arteriam transmittente, et neruo tibiali communi in poplite, diuisionem arteriae popliteae sustinente, animaduertuntur. De omnibus illis ansis et laqueis vno filamento laxe vas transiens continentibus, sine vlla veritatis specie creditum et assertum esse putamus, stringi inde vasorum lumina, sanguinis circulum inde mutari, constrictione augeri, et mediante hoc mecanismo animi pathematum primaria symptomata in oculos incidentia, faciei ruborem et pallorem, produci. Vthoc praestent, longe maiore sane opus fuisset longitudinis neruorum imminutione, quam in vlo musculo cernimus, quin imo haec ipsa arterias venasque altius tolleret, motum liquidi contenti, cum totum canalem non amplectantur, nulla ratione sistere, sufflaminare et minuere, liberioremque vicissim subsequente nerui laquei relaxatione reddere, affluxumque quodammodo augere possunt.

§. 2.

Influxus neruorum probabili redditur.

Verum enim uero si factum ipsum minime in dubium vocandum est, animi sensa pro diuerso corporis habitu, temperamentorum conditione, sanitatis statu cum secundo tum aduerso, idea menti vel mitius vel grauius inhaerente, tam amore quam odio, tam gaudio quam tristitia, spe aequa quam metu, iracundia, cupidinis venereae incendio, aliisque modis corpus in hac vel illa parte vehementer affici, ut mox rubore et ira excandescat, mox pallore exalbescat, ut mox cum vniuersum corpus, tum quaedam loca profusissimo sudore mandeant, mox ariditate fere cutis siccat, ut liquorum saliuallium bilisque fontes largius aperiantur, qui alio tempore vero, et sub aliis conditionibus iusto parcus fluunt, ut crises in morbis perfectae toties tum quantitate cum natura materiei criticae tam saepe mutentur et q. s. a. Quae omnia inquam cum ita sint de causa probabili et vera cogitandum omnino est, quae haec efficiat. Dispiciendum est vniuersum corpus in minoribus et magis latentibus partibus, quae corporea structura mere corporeos producat effectus.

§. 3.

Eiusdem argumenti continuatio.

Neruorum in vasa imperio hunc animi affectuum effectum accensendum esse, partim ex amicibili decursu et neruorum cum vasis frequentissimo connubio, partim ex singulari proportione, qua nerui tam diuersimode per corpus disperguntur, coniectura iam quodammodo prospiciendum erat. Modum vero explicationis inuenire res non adeo facilis est. Spirituum neruosorum et fluidi neruei dominium quamdiu ingenia adhuc irretita tenebat, nemo ausus est, solidae neruorum parti functionis rationem adscribere. Minime

E

autem

autem opus esse existimo ad hypotheses Argenterii Stahliique refugere, et nos tamen nihilominus de probabiliore neruorum actione per solida firma et tenacia filamenta conuincere. Exceptis enim paucis organorum sensoriorum locis in retina, molli vestibuli pulpa, tenerioribusque bulbulis in digitis, glande penis etc. in omnibus fere locis vniuersi corporis in tenacissima fila et membranulas, tensioni saepe satis forti resistentes finiuntur, in plexibus saltem oesophagum vasaque corporis omnia amplectentibus, tantam firmitatem tantumque robur ostendunt, vt de constringendi potentia nulla locum habere possit dubitatio.

At vero hypothesibus non immorabimur, ipsa corporis nostra interiora lustraturi operam dabimus, quid *quinti*, *septimi octauique* paris et *intercostalis* cum pluribus artuum nervis nos respectu plexuum circa vasorum formatorum doceat: Selegi enim praecipuos hos corporis animati nervos, quoniam in efficiendo partium quam maxime dissitarum consensu et harmonia, medico ad diiudicandos effectus saepe haud praeuisos et inexpectatos, tam necessaria cognitu plurimum conferunt.

§. 4.

Neruorum plexus circa ductus excretorios.

Nec minorem fane attentionem postulat obseruatio in omnibus cadaueribus confirmata, quod, prouti vasa sanguifera, arteriae praecipue, ita etiam ductus excretorii plerisque in locis sedibusque prae aliis vberiore filamentorum nerveorum copia cinguntur et circumvoluuntur. In maioribus vasorum truncis id quidem vel raro vel nullibi fit, hinc pauci vel saltem exilissimi nervi comitantur aortam descendentem, cauas venas, earundemque maiores ramos, et validiores crassioresque nervi ab his vasis remotiores sunt. Vasorum autem in minores ramos dehiscentibus, et ad loca vbi praecipuis functio-

functionibus inferuire debent properantibus, neruei surculi cum iisdem sece iungunt, et pari passu factis circa ea elegantissimis plexibus et retibus cum iisdem decurrunt. Talia coniunctionum exempla praecipue in Infraorbitalibus, Transuersali faciei, Maxillari inferiore, Vertebrali, Coeliacae et mesentericarum distributione Renali et in omnibus fere artuum arteriis. Exinde vero enascuntur multiplices nerueorum filamentorum implicationes excretorios canales et ductus stupenda ratione amplexantes, quales nemo sine admiratione in *ductu Stenoniano* cernere potest, vbi coalitiones ramorum buccinatoriorum et massetericorum ex ramo tertio quinti cum variis surculis ex communicante faciei, eundem ductum cingunt, ita pariter in *ductu Whartoniano*, quem plexus rami lingualis quinti, in *pelvi renali* surculi ex plexu renali, et in *canalibus bilariis*, quos rami ex plexibus semilunaribus amplectuntur.

§. 5.

*Notabiliora loca vbi ramuli neruei quinti paris vasa
amplectuntur et cingunt.*

Quinti neruorum caluariae paris dignitas, quod praeter tot musculos et cutis loca neruis muniens, plurimis inter omnia alia neruorum paria sine dubio sensoriorum organorum instrumentis sentiendi impertit facultatem, iam prae reliquis accuratius et perfectius descripta est, cum non solum a b. MECKELIO a) et HIRSCHIO b) ex instituto vniuersi nerui historia verborum expositione enucleata sit, sed nuperrime quoque ab ill. SCARPA c) difficilis huius nerui particula

E 2

nouis

a) *Diff. de Quinto pare neruor. cerebri.* Goett. 1748. et descriptio ganglii sphaeno-pal. in *Mem. de Berl.*

b) *Diff. sist. Disquisitionem anat. paris quinti neruorum encephali.* Viennae 1765.

c) *Annotat. anatom. Lib. II. de organo olfactus praecipuo et de nervis nasalibus interioribus e pari quinto neruorum cerebri.* Ticini. 1785. 4.

nouis inuentis cum descriptione tum nitidissima rami naso-palatini, ossium turbinatorum, et palatinorum delineatione aucta et amplificata fuerit.

Solertissimi autem hi viri cum in prosequenda huius neruorum paris historia suum quiuis scopum prae oculis habuerit, mihi met ipsi iam connubium quorundam eius surculorum cum vasis perscrutari proposui.

§. 6.

In ramo primo s. ophthalmico frontali.

In *ramo primo* quinti paris seu *ophthalmico Willisi*, melius *ophthalmico frontali* nominando, neruorum circa vasa complicationes praecipue in *ramo eius frontali*, qui integri rami primi finis est, memorabiles et conspicuae sunt.

Quamvis enim ramulus nasalis cum in formandis neruulis ciliaribus, tum in progressu ad nares et in continuatione eiusdem in infratrocchlearem, ita pariter ramus lachrymalis circa arterolas quae cum his neruulis versus glandulam incedunt varias forment circa vasa plexulos et reticula, cedere tamen omnino debent illis nunc iam in frontali describendis. Ut vero melius et accuratius discerni illi neruorum surculi possint, qui in retia circa vasa frontis abeunt, in capite, cuius vasa perfectissime repleta fuerunt, cutis cum pericranio a caluaria solui et super orbitas, remota parte orbitaria ossis frontis, reclinari debet, vt in inferiore cutis et reliquorum integumentorum superficie vasorum neruorumque progressus cerni possit.

Neruus igitur *frontalis* antequam orbita exiuerit, in media aut paullo anteriore eiusdem parte emittit adhuc *ramum supratrocchlearem*, qui se binis vel tribus arteriae ophthalmicae ramis, quae nunc iam nomen suum cum denominatione *frontalis* commutat, et qui rami in

in coniunctionem cum arteria angulari oculi interna ex nasali abeunt, et venae ophthalmicae initio se immiscet, et reticulis variis factis, cum in corrugatore superciliorum et orbiculari palpebrarum musculo, tum in palpebris circa easdem ludit. Ipse nerui frontalis truncus autem nunc iam inter arteriam frontalem et cognominem venam in ophthalmicam abeuntem per foramen orbitare superius orbita exit. Si arcum orbitarium ossis frontis attigit, statim cum arteria in duos vel interdum tres ramos, qui deinceps in plures minores diuiduntur, dehiscit. Tres illorum denuo bifurcati amplectuntur ramum arteriae venaeque, et easdem in reticula et plexulos mutatis ita comitantur, ut fasciculus vasorum inter duos neruulorum surculos lateraliter collocatos incedat, qui filamentis partim ex uno neruulo, partim ex altero emissis cinguntur. Vnus eorum ramorum idemque fere maximus magis versus exteriorem frontis regionem temporalem inclinans, occurrit ramo arteriae temporalis orbitam petens et pariter binis surculis cum arteria progeries, variisque versus arteriae truncum temporalem filis intermediis eandem ambit, et cum filamentis nerueis ex ramo temporali profundo ex musculo in cutem prouenantibus coit.

§. 7.

De usu et sequelis horum plexuum in laesionibus fronti illatis non improbabilis opinio.

Cum ad explicanda varia in corpore humano occurrentia phaenomena, quorum expositio et naturae consentanea euolutio ex fabrica partium anatomica repetenda est, saepe de singulari usu et influxu plexuum neruorum circa vasa ludentium cogitarem, et fere conuictus essem, tunicis vasorum minorum tantam neruulorum copiam vix impendi posse, quod maiores trunci illis careant, aliumque igitur adhuc usum et scopum subesse debere, praecipue

me excitauit etiam amplexuum illorum neruosorum ratio in fronte et locis vicinis, eorundemque circa vasa lusus et amicabiles alligationes. Rediit mihi his meditationibus dedito in mentem, quallem non raro Chirurgis metum iniecerint laesiones fronti illatae ad producendam amaurosin aliaque oculorum mala.

Ipse casum scio, vbi ex grauissimo cutis in limitibus frontis et sincipitis ante futuram coronariam, ad cranium ipsum penetrante vulnere, diu post sanationem remanserunt in vtroque antea perfecte fano oculo tunicae coniunctivae inflammations et molestae lachrymationes spontaneae, post anni demum tempus sua sponte cessantes.

Tractavi alium aegrotum, qui lapsu in terram notabilem cutis in arcu superciliorum dextro contusionem, praecise illo in loco vbi fasciculus arteriae et nerui frontalis per foramen orbitare superius orbita egrediuntur, passus est, subsequente et diu remanente oculi dextri dolore, tumore, albugineae inflammatione et lachrumarum immoderata et vix coercibili profusione. Annuo circiter spatio praeter lapsu sensim enarratae molestiae minuebantur, et tandem plane cesserunt.

Semel aegroto iuueni aliquot tumores cysticos in fronte versus glabellam et in occipite haerentes nucis auellanae magnitudinis execandos et extirpandos curauit: Finita vulneris sanatione, ter vel quater ex leuissimo pedum refrigerio vehementi laborauit oculorum inflammatione. Nunc iam ab aliquo aetatis et vitae suae spatio decurrente, licet omnibus aeris et tempestatum iniuriis sese expuerit, frequenter venatum profiscatur, et in veneris castris non modice militare soleat, ab omni oculorum incommodo liber et immunis est.

Egidem non negabo, vulnera caesae fronti inficta subsecutam esse guttam serenam, aut aliud quoddam oculi interioris vitium visui insidio-

infidiosum; at enim vero, an tales amauroses ex sola nerui frontalis in fronte laesione, ex communicatione nempe, quae huic neruo, mediantibus neruulis ciliaribus, ex ramo eiusdem nasalí, et radice communicante cum pari tertio et ganglio ciliari, cum interioribus bulbi partibus intercedit, ortae fuerint, id mihi propter exilitatem illorum neruorum ciliarium, qui ex ramo primo hoc quinti, cuius neruus frontalis continuatio est, proueniunt, admodum improbabile esse videtur.

Insequi autem posse, si reuera annotatae fuerunt, arbitror ex mutatione quadam grauiore in interiore encephali parte sub ictu contingente, quae nos latet, cum vita aegroti superstes examen profundioris cerebri regionis, ex qua neruus opticus ortum petit, aut nerui ipsius, non admittat. Ex quibusuis vero externarum regionum laesionibus et operationibus ibidem interdum cum utilitate et prosperitate aegroti suscipiendis, quales tumorum cysticorum extirpationes sunt, si partibus in caluaria contentis nulla illata iniuria fuerit, visus priuationem metuendam esse, mihi nullo modo persuadeo.

Sequelae igitur enarratae, quae nisi semper, tamen frequentissime omnes illas fronti et regionibus vicinis inflitas plagas, contusiones, tumorum cysticorum et tunicatorum extirpationes, forsan etiam trepanationem in fronte et sincipite peractam comitantur, ex mea quidem sententia potius arteriae frontalis ramis et nervulorum eorundem circumvolutioni, quam neruo soli adscribenda sunt.

Quodsi enim unus vel alter maiorum arteriae frontalis ramorum maiorum perscissus est, lumina eorum peracta consolidatione vulneris clauduntur, et liberum sanguinis per arteriam ophthalmicam irruentis iter, obturatis pluribus arteriae frontalis osculis tollitur. Ex quacunque itaque causa congestiones versus caput oriuntur, oculus labora-

laborabit, donec successu temporis laterales arteriae frontalis rami cum temporalibus coeuntes ampliores redditi, liberiorem sanguinis ex orbita in frontem transitum, hactenus impeditum, denuo admittant. Quo itaque restituto incommoda oculi sua sponte pro futuro cessant.

§. 8.

Plexus neruorum ex Ramo secundo quinti seu Maxillari superiore vasa sequentes.

Nec minus memorabiles quin potius celebriores sunt et copioiores neruorum circa vasa complicationes ex *Ramo secundo quinti* enatae. Iam ipse integer *nerui maxillaris superioris truncus* in canale suo et in fissuram sphenomaxillarem ingressu, et in uolucro suo cinctus, pluribus circumlegitur vasorum tenellorium surculis, qui in subiectis idonea materie repletis egregium offerunt visui spectaculum. Aperta dein membranacea illa capsula, quae fissuram sphenomaxillarem inuestit, et in pinguibus subiectis adipe repletur, quaeque aliquantis per, in interiore saltem lamella, durae matris propago est, arctissime sane cum duro neruorum inuolucro cohaeret, elegantius adhuc vasorum rete ipsam nerui substantiam obducens in conspectum prodit, quod omnes maiores ramos sequitur, et praecipue ganglion sphenomaxillare nitidissime amplectitur.

Qui deinceps rami progrediuntur, siue singuli siue cum alio coniuncti, vasa quilibet sua cingunt, et cum iisdem ad varia capitis loca, quibus destinati sunt, abeunt, quorum vero amplexus in nullo tam grandes et multiplicati sunt, quam in neruo infraorbitali, tam in canali suo adhuc latente, quam per faciem iam distributo. Tangendi vero et perscrutandi antea sunt minores huius nerui diuisiones, *vidiani* nempe, *pterygo-palatini*, et *naso-palatinus* *Scarpae*.

§. 9.

§. 9.

Ramus Vidianus.

Neruus Vidianus, derelicto ramo suo seu potius trunco *pterygoideo*, qui in ganglion spheno - maxillare abierat, simul cum arteriola illum concomitante, canalem Vidianum intrat, et in plura filamentula diuisus, paruae medullae spinali quodammodo similis, arteriam talem in modum amplectitur, ut paucis in locis per liberos a neruis relictos hiatus rubri parietes arteriae pelluceant. Dum hac ratione neruus Vidianus in canali suo versus posteriorem eiusdem aperturam progreditur, et diuersos surculos, partim ad nares, partim pro formanda vnione cum portione dura nerui acustici seu *communicantis faciei* in elatiorem aquaeductus Fallopii partem, partim ad formandam cum radice ex sexto *nerui intercostalis* primam originem, exhibuit ediditque, omnes illi arteriae Vidianaee surculi tenellis horum neruulorum filis cinguntur. Cum ex his arteriae Vidianaee surculis plures in cauernulas ossis sphenoidei spongiosas, ad nutriendum os abeant, microscopii adeo ope tenuissimi neruulorum capilli distingui possunt, qui cum arteriolis os intrant.

§. 10.

Ramus Naso-palatinus Scarpae.

Multiplices fiunt in fissura spheno-maxillari cum ramis rami secundi quinti paris et arteriae maxillaris internae combinationes.

Ramus *naso-palatinus Scarpae d)*, dum ab altiore fossae pterygoideae regione, per fissuram spheno-nasalem supra septum se incuruat, et vti recte celeb. SCARPA e) annotauit, cum arteriola,

quae

d) Egregie illum delineauit ill. ANTON. SCARPA in *Anat. Ann. L. II. Tab. I. ff.*

e) Lib. cit. p. 73.

quae quidem fatis insignis est, vti ex periculis saepe narium haemorrhagiis patet, a ramo palatino - nasal i orta, inter periosteum septi narium, et membranam pituitariam per septi narium quodlibet latus ad foramen incisuum s. palatinum anterius decurrit, ibidemque cum nervis vasisque membranae pulposae palati coit. Laborem taedio plenum, nec difficultate carentem requirit, rationem expiscari in durissima hac membrana, quam seruant vasa nervique per septi narium membranaceam partem decurrentes. Opus fuit, cum in subiectis recentibus, tum in spiritu afferuatis, maceratione, vt tractabilius et ad perscrutandum magis idoneum redderetur periosteum, qua ratione volvellae ope tot laciniae et frustula emolliti periosteum auferri possunt, vt distinctius vasorum nervorumque decursus cerni et distingui queat. Sub hac encheiresi omnino obseruationes ill. SCARPAE f) confirmatas vidi, hunc *neruum naso-palatinum* per proprium et peculiarem canaliculum, pone canalem incisuum exire ad membranaceam palati papillam, retro dentes incisiuos haerentem, id tamen cum meis qualibuscunque disquisitionibus vix bene conciliare possum, hunc *neruum*, “*nullo septi membranae dato surculo*” g) ad palatum procedere.

Nisi omnia sane me fallunt, in illis capitibus, quae antea perfectissime in arteriis injectionis materia ad amussim penetrante vt venae aequae plenaे fuerint, repleta sunt, animaduertisse me arbitrор, ramum illum nerueum, retia circa comitem arteriam formans, quae in membranam septi cum ramis vasorum abierint, et filamenta illa nervi, per canaliculos suos ad papillam abeuntia tenebriora fuisse trunculo ipso per septi exteriorem superficiem decurrente. Nec minus evidentes fiunt inter ramulos vasorum cum rami paris primi per foramina laminae cribrosae ossis ethmoidei in septum narium descendentes et haec vasa combinationes, ex quibus non
fine

f) Lib. cit. p. 81. 82.

g) Pag. 76.

sine aliqua probabilitatis specie ad nerui primi paris cum ramo naso-palatino Scarpaee concludi possit anastomosi.

Non plane improbabile esse videtur, in notissimis criticis illis narium haemorrhagiis, quae ut plurimum, quin frequentissime aut plane semper ex aliqua septi narium in uno vel in altero vel vero in utroque latere arteria fiunt, iucundam saepe aegrotis titillationem praecedere, quo sensu permoti frequenter digito narium interiore superficiem fricant cum sanguinis stillicidio subsequente.

§. II.

Ramus pterygoideus et palatinus.

Implicatur statim *ramus pterygoideus* cum fasciculo vasorum eundem per canalem pterygo-palatinum ad palatum comitante. Exeunt simul cum neruorum ramis per ossa turbinata distributis vasorum surculi, quos, si membrana pituitaria ab ossibus detracta ab exteriore superficie lustratur, eleganter cingunt.

Nerui palatini communis per canalem pterygo-palatinum descendens diuisio in *minorem ramum*, qui palato molli, vuulae, tonsillis et principio pharyngis surculos dat, ubi etiam primae copulationes cum ramo pharyngaeo ex octauo s. potius glossopharyngaeo, et arteria pharyngaea Halleri fiunt; et *maiores* per foramen palatinum posterius erumpentem, et per totum ambitum membranae pulposae palati distributum, simul secum afferit et deducit vasorum fasciculum, inter quos praecipuus est, et a nobis solummodo scrutandus qui *ramum palatinum anteriores et maiores* comitem habet, cuiusque decursus et distributio incomparabili solertia et nitore depicta est a celeb. SCARPA h). Referri merentur huius rami palatini maioris circa vasa palatina complicationes

F 2

et

h) Anat. ann. L. II. Tab. II. fig. 11. 18. 19. 20. 21.

et amplexus mutui inter praecipuos et varietatibus minus obnoxios. Ut vero satis commode illos intueri possimus, requiritur pariter specialis administrationis ratio. Resecanda nempe est serra ope coelum palatinum osseum cum arcu alueolari maxillae superioris usque ad alas pterygoideas et partem verticalem ossis palatini, dein separandae sunt alae pterygoideae pone originem illorum ex osse sphenoideo, ut totus ramus palatinus cum vasis in canali conseruentur, auellendum tandem est totum coelum palatinum osseum, et nunc membrana pulposa palati commodissime in illa parte examini potest subiici, vbi coelo adhaesit palatino. Dispescitur plerumque, bene repraesentante ill. SCARPA, ramus palatinus anterior s. maior per foramen palatinum posterius delapsus, in tres fasciculos maiores et aliquot minores, cum totidem fere ramis palatinis dehiscit. Decurrunt iunctim versus arcum alueolarem, et dum per exigua coeli palatini ossei foraminula ramuli arteriarum cum nasalibus interioribus communicent, luculenter destinguere potui, etiam tenerima filamentula ex plexu hoc palatino cum vasis in membranam meatum narium inferiorem obducentem penetrare. Formant nerui plura reticula circa vasorum ramos, et cum iisdem omnem rugositatem membranae pulposae palati perreptant ad gingiuas usque. Non reticendum hic quoque est singularis horum neruorum vasorumque varietas, quam hac hyeme in cadavere virginis 16. annorum dupli hiatu palatino instructo, et cuius vasa eleganter cera colorata repleueram, obseruau. i.

Cum perfecto in omnibus partibus narium septo, attamen valde plicatili, deerant binae coeli palatini ossei partes septum cum arcu alueolari iungentes, ut itaque vtraque narium cavitas cum ore vnum idemque cauum formaret, dupli rictu versus laminam cribrosam ossis ethmoidei ascendens, et septo narium diuisum, in cuius summa extremitate alueolari vnicus dens incisius haerebat. In ipso

ipso hoc septo quoad vasa et neruos omnia erant naturali statui perfecte similia. Nerus autem palatinus cum arteria ex canali pterygo - palatino descendentes, longe erant minores quam in consueta fabrica in proportione corporis statutae esse solent, et quicquid vasorum neruorumque alias per membranam pulposam palati solet dispergi, in hoc deformati palatu per gingiuas vtriusque arcus distribuebatur. Vix autem, si arterias mesentericas et ramos coeliacae excipio, recordor me elegantiores circa vasa neruorum plexulos vidisse illis qui per gingiuas horum arcuum alveolarium difeminabantur.

§. 12.

Nerui infraorbitalis circa vasa irretiti plexus.

Neruus infraorbitalis eodem iure rami secundi quinti paris continuatio et finis censendus est, quo ramus infraorbitalis arteriae maxillaris internae finem facit. Singulari ratione integri nerui maxillaris superioris diuisionem cernere possumus, si, *vti in meis iconibus delineari curaui*, decursus nerui maxill. sup. non ex lateribus, *vti hucusque factum est*, sed ex parte superiore inspicitur, in quem finem omnes superiores partes a basi caluariae cum neruis et vasis et ipse ramus primus quinti paris remouendae et auferendae sunt, *vt superior ambitus fissurae spheno - maxillaris et spheno - nasalis* ubique liber et apertus sit. Incedit integer nerui maxillaris superioris truncus canali suo inclusus recto versus fissuram sphenomaxillarym aut aliquantis per declivis: Si locum attigerit vbi in varios ramos dehiscere debet, paullo magis versus exteriorem fissurae regionem inclinat, quasi totus in ramum infraorbitalem abiturus. Ex superiore loco nunc visus, tres praecipue rami, in hoc situ tantum discernendi, notantur, fasciculus neruorum nasalium versus interiora, ramus Vidianus ab interioribus versus posteriora procedens cum

F 3

ganglio

ganglio spheno-maxillari, et ramus infraorbitalis paullo magis versus exteriora: ramus pterygoideus omnium maxime inferior fissuram pterygo-palatinam intrans, cum ab aliis ramus tegatur, ex hoc loco spectatus bene distingui nequit.

Videtur ramus secundus quinti paris quasi in duas portiones findi, quarum *minor* paullo magis interior ex ramis constat, pterygoideo, fasciculo nasalium et vidiano, qui ganglio spheno-maxillari vniuntur, *maior* autem tota in ramum infraorbitalem cum suis minoribus ramis alveolaribus et subcutaneo malae impenditur.

Hic ramus infraorbitalis in latissima fissurae spheno-maxillaris parte arteriae maxillari internae per hanc dictam fissuram serpentino ductu migranti at in plures ramos, inter quos arteria infraorbitalis maxima est, dehiscenti occurrit, et partim cum hac arteria, partim cum plexu venoso spheno-maxillari mirabili modo irretitur.

Emissis dein ramis, dentali superiore et subcutaneo malae, ramus infraorbitalis cum arteria et vena comite canalem infraorbitalem intrat, et in illo, vsque ad exitum eius in faciem, multiplicibus filis arteriam venamque amplectitur. Diuiditur nerv. infraorbit. secundum probatissimas, nunc omnibus iam notas, descriptiones in tres partes, ramum nempe *subcutaneum malae*, *alveolarem maxillae superioris*, et *infraorbitalem*; nisi prior, nempe *subcutaneus*, prouti in multis subiectis fit, et a beat. et desideratissimo MECKELIO i) delineatum est, ex ipso trunco prouenerit. Vnus vel alter ramus, ex hoc vel illo ramo, vel ex trunco ipso interdum proueniens solis musculis prospiciens, nostro scopo non inferuit.

Antequam igitur neruus infraorbitalis cum sua comite arteria apertura anteriore canalis infraorbitalis exierit, plerumque tres ramos emisit: 1) *ramulus antri highmoriani*, qui cum simili ramo arteriae

i) *Diff. incompar. cit. Fig. I 56.*

arteriae infraorbitalis per exiguum foramen membranam illam petit, quae finum maxillarem inuestit: Saepe ex hoc, saepe absque nexu cum illo prodit ramus dentalis cum ramo dentali posteriore ex alveolari anastomosi iunctus; nitidum vasorum neruorumque rete format hic ramus sinui maxillari superiori propiciens. 2) *ramus superficialis nasi*, qui partim dentibus incisiis adhuc fibrillulas mittit, partim nasum attingit: 3) *Continuatio trunci nerui infraorbitalis*. Cum hac ultima et maxima nerui infraorbitalis portione egreditur simul arteria anteriore apertura canalis infraorbitalis declivi paullulum decursu in faciem. Neruus iam in multos ramos diuisus arteriam ubique amplectitur et obtagit, ut pauca vestigia translucentis rubrae arteriae supersint. Similes repetitae nerueorum ramorum diisiones et subdiisiones cum vasis repetuntur per reliquum nerui decursum super illam faciei partem, quae inter orbitam, nasum, zygoma, tuber maxillae et labium superius continetur, ut certissime nulla paullo memorabilis arteriola inueniatur in hac regione, quae non binis vel unico ramulo nerui mox rursus diuisi et cum altero irretiti cingeretur. Id vero praepartis in *ramulis palpebralibus, nasalibus* et *praecipue labialibus* egregie visu est, a quibus stupenda papillarum labii superioris fabrica pendet. Quodsi etiam furculi neruei cum aliis vniuntur, vti in hac parte multiplices tales cum infratrocchleari et pluribus ramis communicantis faciei ex septimo pare perficiuntur, fere semper vasorum ramus anastomoseos et unionis comes erit.

§. 13.

Applicatio huius structurae ad phaenomenon quoddam.

Grauitas et dignitas rei sane postulat, accurata et diligente obseruatione et meditatione in symptomata, usum et sequelas inquirere, quae ex eiusmodi constante et eleganti neruorum cum vasis copula enasci possit. A meo

A meo sane scopo iam alienum est, ad omnia momenta attentionem dirigere, quae in morboſo corporis ſtatu, cum auxilium medicum, tum chirurgicum efflagitante, colligi et enodari debeant. Subſiftam modo in delibando vniſo phaenomeno physiologico-pathologico, quod nobis offert *ſtructura papillarum labii oris superioris*. Dixi iam ſuperius, et nunquam ſatis repetere poſſum, rarius id fieri, vt neruei plexus maiores vaſorum truncos, in infimo ventre autem exceptio locum habet, amplectantur, ſed in minimis canaliculis id preeprimis locum habere. Eiusmodi locis nunc pree omnibus annumerandae ſunt papillae ita dictae cutis, et maxime *labiorum oris, linguae, areolae mammae cum colliculo intermedio, digitorum, penis, glandis clitoridis et villorum intestinalium.*

Labiorum oris, et potiſſimum labii superioris papillarum ſtructura, qualem ſub perfectiſſima vaſorum repletione in meis preeparatis cerne re licet, inter elegantiſſima naturae artificia pertinet k).

Per totam ſuperficiem rubram vtriusque labii oris diſſeminata eſt infinita copia villorum, villis in tunica intima intefinorum tenuium hominis perquam ſimiliū, reliqua cutis labiorum parte glabra. Maior illorum copia in labio ſuperiore, vt ampliore, vbi etiam longiſſimi ſunt: inter plures eiusdem longitudinis et craffitieſ eminent alii longiores et craffiores, plerique vero in craffiſculum terminantur bulbulum. Vaſa eſſe maximam partem docet elegans rubor a contenta materia, ſed optima lente ſimul diſtinguiamus teñerrima albiantia fila et maculas, neruorum procul dubio in eosdem continuationes. Qui nunc ſenſum exquisitum conſiderauerit, quem

k) Aliquantisper repræfentationem ſed minime ſufficientem horum villorum inuenies in magni inciforis beat. BERNH. SIEGFR. ALBINI *Annotation. acad. Lib. VI. Tab. III. fig. 1.* Difficultatem exprimendi hos villos

egometiſe iam bis expertus ſum, a diuerſis pictoribus delineari pro aduertiſiis academicis meis curauī, in nulla autem figura id expreſſum eſt, quod auditores mei, et qui Muſeum meum perluſtrarunt, admirati ſunt.

quem admotis labiis parti cuidam percipimus; qui de periculo infectionis diuersae persuasus est, qua contaminari possumus, si sub quacunque laesione aut destructione epidermidis basis inquinatum os alterius, aut vas quoddam impurum bibendo tangimus, de neruorum in vasa et hos villos imperio non amplius dubitare potest.

§. 14.

Rami tertii quinti paris ad vasa relationes.

Ramus tertius quinti paris seu *maxillaris inferior*, quamvis omnium huius paris rimatorum maximus sit, non tam multipli-ces tamen et insignes cum vasis complicationes format, quam duo rami priores: forsitan quod maxima filorum nerueorum suorum copia musculis impendatur.

Notissimum iam est, quod post meas repetitas obseruationes et iconem ¹⁾, etiam receperunt nostri aeui incisores, duas esse portiones, quae ad integrum par quintum formandum confluunt, quarumque minor in ramum tertium inclinat. Ut vero omnes fasciculi portionis maioris multiplice vnione et diuisione in ganglion seu potius plexum gangliformem coalescunt, haec portio minor id singulare habet, quod cum plexu illo non commisceatur, sed facta leni versus posteriora incuruazione, cum ramo tertio quidem per foramen ouale crano egrediatur, facto autem egressu, tota quanta in musculum pterygoideum consumatur.

Diuisioni cognitae, quam ramus tertius in plures ramos tam validiores, quam debiliores patitur, cum nihil magni momenti addi possit, id tantum notari debet, varios arteriae maxillaris internae ramos sine constanti ordine per fissas rami tertii

¹⁾ De quinto pare neruorum encéphali, et de neruis, qui ex eodem portio duram matrem ingredi falso dicuntur. Goett. 1777.

portiones vadere: Cum vero nunquam vel haec vel illa cum constantia neruorum plexibus inuoluatur et cingatur, nobis tantummodo in illis rami tertii quinti paris subsistendum est ramis, qui ad vasa, aut ductus excretorios, eorumque munia pertinere videntur; et si huic satisfacere studemus, perscrutabimur praecipue ramos, *lingualem* et *alveolarem maxillae inferioris*.

§. 15.

Ramus lingualis ex quinto pare.

Coniuncti paullo antea bini neruorum insignes fasciculi, *alveolaris maxillae inferioris* et *lingualis*, maximam filamentorum nerueorum rami tertii absorperunt: facta illorum separatione, *ramus tantillum anterior*, assumto mediocri filamento, ex cauitate tympani per fissuram Glaseri adueniente, quod sub nomine *chordae tympani*, appellatione minime conueniente, omnibus notum est, sub rami *lingualis* significatione ad linguae apicem properat.

In illa via, antequam linguae carnes attigerit, emittit constantem fasciculum, qui vel propriis suis filamentis, vel uno altero que surculo a ramo *mylohyoideo*, vel, quod semel vidi, ex nono pare accidente, in multis cadaueribus, minime in omnibus, in gangliolum quoddam intumescit, optime a beat. MECKELIO m) delineatum, et maxillare dictum. Dispersi ex hoc gangliolo, aut si talis structura non adest, ex plexu, ramuli neruei cum surculis arteriarum glandularium ex labiali prodeuntium irretiuntur, et minimas illarum diuisiones per glandulam submaxillarem dispersas illaqueando inseguuntur.

Ex eodem trunci loco, cum radice praecipua ganglii maxillaris prouenit *primus ramus communicans* cum nono pare, ex qua vnione plures

m) *Diff. cit. Fig. I. 74.*

plures surculi ramum arteriae lingualis superficialem amplectuntur,
et nitidum neruorum rete circa eandem formant.

Sequitur dein *alter ramus communicans* cum nono, cuius surculi tam profundiores linguae musculos penetrant, quam arteriam lingualem profundam ambiunt: Paullo post trunco egreditur *ramulus nerueus insignis* ad glandulam sublingualem, et arctissimo reti cum vasis sanguiferis glandulae copulatur. Cum tandem truncus rami lingualis ex quinto in plures ramos fissus versus anteriorem linguae regionem incedit, ductus saliuialis Whartonianus inter duos magnos ramos inclusus, ex quibus tenella filaments ex uno in alterum mittuntur rete formantia, versus linguae fraenulum procedit, et pone illud in cognita papilla aperitur.

§. 16.

Ramus alveolaris maxillae inferioris.

Hic ultimus rami tertii paris quinti ramus, quodammodo **maximus**, paullo post quam ex trunco suo processit, sibi adsociat *ramum arteriosum alveolareum maxillae inferioris* et venam homonymam. Cum his in fasciculum, duriore cellulosa inuolutum, cinctus, versus canalem maxillarem decurrit, et licet in transitu per canalem cum neruus tum vas in ramulos plures diuidantur, semper tamen plurimum sunt ramorum nerueorum qui vas intermedia amplectantur.

Quamuis in definiendis corporis humani attributis et structura obseruationes ex homine desumptae omnes alias praecedere debeant, in hac nostra consideratione annotationes in quibusdam brutis factas, in quibus hic neruus admodum grandis esse solet, praemittere volo. Desumpta est descriptio ex maxilla inferiore vituli, cuius vas ad amissim erant repleta. Decurrit fasciculus neruorum et vasorum

pone limbum inferiorem maxillae, ad quem ipsum pertingunt fasciculi illi membranacei et vasculosissimi dentium primordia comprehendentes, ita quidem, ut fasciculo vasorum neuorumque immediate incumbere videantur. Pro hac membrana alveolos obducente fouenda et nutrienda, exeunt ramuli arteriae alveolaris cum binis, tribusque nerueis filis, et repetitis divisionibus et factis anastomosis per membranam distribuuntur, ut tota vasculosissima et ruberrima reddatur: Lentis ope clare potest animaduerti, tenerima albicantia fila, neuuorum propagines, vasa sequi et amplecti. Derelinquit dein hic fasciculus canalem maxillarem, et per aperturam eius anteriorem in exteriore maxillae inferioris superficie erumpit, et per labium oris inferius dispergitur.

In cadaueribus humanis id tantum diuersitatis occurrit, quod non solum canalis maxillaris per medium maxillae inferioris partem incedat, et sepimenta inter foramina alveolaria crassiora sint, ceterum similis structura in hominibus ac in brutis locum habet. Erumpens per foramen mentale neuus alveolaris maxillae inferioris una cum arteria et vena, ut per regionem mentalem dispergantur; ut plurimum neuus in duas portiones dividitur, quarum quaelibet, cum duobus vel tribus minoribus ramusculis totidem ramos vasorum sequitur, et in minora filamenta fissa, versus labium oris inferius inclinant. Pauci illorum ramorum per cutem distribuuntur, plures superficie interiori oris referuati sunt, quam eam ob causam tam vasa sanguifera eleganter coccineam, et nerui acutissime sentientem reddunt.

Vt hi neuorum vasorumque fasciculi inexplicabili ratione cum ramis arteriae labialis, et pluribus furculis nerueis ex ramo maxillari inferiore communicantis faciei ex septimo pare communicant, sic praecipua attentione digni sunt illi huius plexus furculi, qui labium oris inferius ipsum attingunt. In similes enim villos, faltem
tam

tam numero rariores, quam structura teneriores mutantur, quam in labio superiore, et procul dubio eiusdem efficaciae in producendis symptomatibus et sequelis sunt, uti occasione nerui infraorbitalis, in labio oris superiore notatum est.

§. 17.

De portione dura nerui acustici, seu quod conuenit melius, de neruo communicante faciei.

Neruus hic, qui ad normam commodioris et breuioris denominandi et significandi rationis, quae antiquis placuit incisoribus, 5^{to} veterum et 7^{mo} recentiorum pari, vel in genere *neruo acustico* annumeratus fuit, sine omni alio fundamento, quam, quod iunctim meatum auditorium ingrediuntur. Cum vero semper perpenderem, hunc neruum durum vulgo appellatum, *ortu, decursu, natura, canali* quem occupat, *distributionis sede et usu*, a portione molli dicta paris septimi vel auditorii longissime diuersum esse; non amplius dubitaui illos separare, et novo nomine *communicantis faciei* hunc insignire, quam significationem etiam, ceu magis conuenientem, tanquam suam assumserunt varii magni nominis incisores, ill. PFEEFINGER n), et HAASE o).

Rami superficialis Vidiani in *communicantem faciei* per aquaeductum Fallopii decurrentem insertio, iam primam offert eiusdem cum pari quinto coniunctionem, quam, sub vltiore progressu mediante chorda tympani denuo confirmans, post exitum tandem infinitis fere anastomosibus per omnem faciei regionem cum plerisque ramis quinti paris sustinet.

G 3

§. 18.

n) In egreg. Diff. anat. de stru-
ctura neruorum Part. II. Argento-
rati 1783. p. 41.

o) In doctiss. et utiliss. libro Cere-
bri neruorumque anatome repetita Lips.
1781. 8. §. 151.

§. 18.

Quaedam obseruationes respectu magni retis neruosi integri trunci.

Peractum iam et summa cum diligentia et laude fere finitum laborem denuo agerem, si post inimitabilem ill. olim et beat. MEC-KELII p) descriptionem et delineationem, portionis durae superficiem decursum denuo proponere vellem. Cum vero a diuersa praecipuorum eiusdem ramorum decurrenti, diuidendi, et cum ramis quinti paris communicandi ratione, in facie humana tot et tam diuersi effectus lineamentorum, characterum et in genere physiognomiae pendeant, quae cum in statu sano, tum ijetiam morboſo praecipue, voce satis clara et signis obſeruatori instructo indubiis, latentem statum ſignificant, non ſatis repeti, et nouis obſeruationibus adumbrari poſſunt quaeuis memorabiles nerui communicantis faciei varietates.

Haec itaque cauſa eſt, cur aliquam ſemel animaduerſam, praecipuo meo themati praemittam. Non ſine ſufficiente ratione credere poſſum, inter rariffimas varietates pertinere forſan a nemine adhuc viſam, cum manifestam et ſatis inſignem obtulerit nerui communicantis faciei, cum ramo ſatis forti octauo paris recurrente anastomofin.

§. 19.

Rara nerui duri cum octauo pare anastomofis.

In cadauere adulti hominis die 7^{mo} Febr. 1776. examinati nervus durus, datis ramis posterioribus, inconsueta ratione diuidebatur, et cum ramo inconsuetu coniungebatur.

Media

p) Mem. de l'ac. roy. des scienc. de Berl. Tom. VII. vel ej. Physiologische und anatomische Abhandlungen von einer ungewöhnlichen Erwei-

terung des Herzens, und denen Spannaderen des Gesichts. Berlin, 1755. 4-pag. 22.

Media circiter in Parotide, inter acinos eiusdem quasi sepultus, in tres magnos ramos statim diuiditur, quorum primus ramum inferiorem, secundus *ramum communicantem cum octauo*, et tertius communem quasi truncum sed breuem rami superioris constituit.

Ramus inferior, consuetam subit diuisionem in ramum subcutaneum colli, cum nervis ceruicis communicantem, et in alterum ramum versus maxillam inferiorem directum, qui subcutaneo longe maior est. Hic *ramus maxillaris* statim ex separatione a subcutaneo fortem et robustam ansam cum ramo faciali inferiori constituit. Deinceps truncus in duos magnos ramos diuiditur, alterum inferiorem et minorem ad oram maxillae inferioris super Masseterem incidentem, qui datis multis surculis in Platysmamyoidem, cutem, Masseteremque ipsum, mentum deinceps attingit, ibidemque pluribus cum labialibus mentalis factis communicationibus, in orbiculari oris, depressore labii inferioris, quadrato menti et cute faciei finitur.

Alter maior ramus, exhibitis multis exiguis filamentis ad Masseterem, et nonnullis tenerrimis ramis ad ramos faciales inferiores, in duos aequales ramos finditur; quorum superior statim cum magno ramo transuersali faciei confluit, et magnam ansam constituit, alter siue inferior derelicto Massetere versus buccas tendit, cum buccinatario multis filamentis coniungitur, vix extricabilem plexum constituit, et pluribus filamentis in musculis ibidem positis, cute et angulo oris finitur. Creberrime inde ansae cum ramis facialibus mediis et plexu zygomatico seu faciali formantur.

Secundus ramus, qui in hoc specimine medium constituit, et qui praecipuum obseruationis a consueto naturae tramite aberrantis sifit, breuissimum modo truncum format, post coalitum cum ramo insigni ex ipso trunco octauo paris supra ortum rami pharyngaei versus foramen stylomastoideum recurrente, in quatuor nouos ramos diuisum, quorum duo priores, mox a diuisione rursus confluunt, et magnam

magnam crassamque ansam formant. Foramen potius appellare debemus, per quod migrabat Arteria auricularis. Ex hac deinceps ansa tres magni rami ad faciem mittebantur, quorum superior ramus binis radicibus ex communī trunco oritur, quae inter se pariter nouam ansam faciunt, postquam hae radices in vnum trunco confluxere, breui decursu facto, cum magno trunco secundi rami, qui cum posteriore coniungendo formatur, denuo valide connectitur, et nunc ab eodem separatus, communem quendam trunco pro temporali, frontali, supra orbitali, et zygomaticis superioribus formabat, quorum decursus a naturali itinere nihil diuersi habebant.

Alter ramus horum trium ramorum ex ansa prouenientium, binis cruribus oritur, quorum crurum superius ex ansa superiore rami primi vel superioris oritur, inferius ex ansa tertii rami ortum dicit. Nunc breuem trunco format, mox cum insigni quodam ramo posteriore totius trunci duri confluit, et validissimam ansam cum eodem constituit, inter quam magna vena temporalis intercedit, et versus tempora diuiditur. Ad hanc ansam formandam quodammodo secundus ramus consumitur, ex qua ansa vel arcu deinceps plerique nerui zygomatici et faciales oriuntur, quare eorundem iter nunc non amplius describemus.

Tertius ramus s. inferior pariter dupli crure oritur, alterum crus ex coniunctione cum ramo medio siue secundo, alterum vero ex ramo magno posteriore, qui in hac obseruatione, primaria attentione dignus est.

Tertius primarius ramus ex superiori ramo totius trunci, singularem quendam neruum constituit, cuius apud scriptores nerui duri, nulla ratione situs atque itineris mentio facta est. Egreditur nempe trunco portionis durae in loco maxime posteriore atque profundo, retro venam magnam temporalem incedit, eademque obtegitur,

tegitur, et cum reliqui tres rami venae temporali incumbant, hic noster ramus commode *ramus facialis posterior* appellari potest. Elegantissimum spectaculum visu est, quomodo haec vena temporalis per hunc plexum migrat. — Diuiditur hic ramus facialis posterior iam sub ipsa vena in duos ramos, aequalis magnitudinis, quorum superior cum trunco superiore, et ansa rami medii confluit, inferior autem cum ramo secundo s. medio coniungitur, et nouam ansam facit, ex qua magna ansa siue area, vti diximus, reliqui nerui zygomatici, faciales superiores, medii, atque inferiores oriuntur.

Rara haec varietas, quam ab illo tempore, quo primum eandem vidi, et ex quo cadavere etiam haec descriptio deprompta est, semel elapsa hyeme repetere mihi licuit, admodum idonea videtur, ad mirabilem ventriculi consensum in quibusdam hominibus cum facie illustrandam et euincendam. Non enim adeo infrequens est obseruatio homines videre, qui, saburra in ventriculo laborantes, miras patiuntur lineamentorum et physiognomiae mutationes, cum singulari muscularum faciei lusu et agitatione: quibus paullo post, impuritatibus siue a nimia ingestorum copia, siue ab humorum gastricorum inquinamento, siue a bile et succo pancreatico, ex duodeno in ventriculum regurgitante, ortae fuerint, vel sursum vel deorsum expulsis, serena frons, et vultus naturalis reddit.

§. 20.

Plexus arteriae transuersalis faciei.

Inter alias partes, quas nerui communicantis faciei plexus ambiunt et comitantur, illi reliquis facile palmam praeripient, quos a) durus neruus circa arteriam faciei transuersalem format, b) vbi venas, et praecipue venam magnam faciei amplectitur, et c) dum duellum Stenonianum cingit: de primo itaque primum sermo faciendus.

H

Ramo

Ramo nempe communicantis faciei superiore in duos magnos ramos, *temporalem* nempe, et *zygomaticum* dehiscente, transit per hanc furcam ramus arteriae temporalis sub nomine *transversalis faciei cognitus*, et ansae instar illam fulcit et sustinet, cum ramulus non mediocris inter utrumque ramum temporale et zygomaticum intermedius, arteriam transversalem per foramen hoc nerueum migrantem excipit, ex quo ipso loco arteria ramum illum insignem massetericum superiorem musculo masseteri ablegit. Ex ramo *temporali* nerui communicantis faciei, qui caeterum tribus magnis ramis arcum zygomaticum supergrediens altiorem temporum regionem petit, quartus ramus magnitudine reliquis non cedens cum ramo zygomatico denuo confluit, et ipsi ramo zygomatico nunc insignem conciliat magnitudinem.

Effert sese sub hoc ramorum nerueorum confluxu continuatio arteriae transversalis faciei, et ex loco profundiore in sublimiore quasi emergit. Rami illi neruei, alter nempe ex ramo temporali, alter zygomaticus, nunc rursus separati, super faciei partem transversalem inter arcum zygomaticum, arteria transversali faciei intermedia, incedunt, et multis minoribus surculis, ex ramo temporali cum retro, tum ante arteriam in zygomaticum insertis reteque formantibus, arteriam tam arte amplectuntur ut vix eleuari possit: repetitae surculorum nerueorum subdivisiones et nouae coniunctiones, paruas inter se relinquunt liberas areolas, per quas rubra pellucere potest arteria. Vbi arteria faciei transversalis neruorum plexu hoc modo inclusa, altiorem zygomaticis regionem attigit, et in minores surculos dividitur, quorum maximus cum arteria infraorbitali coit, elegansissimo rete neruoso ubique tectus, separati illi rami neruei tandem in unum communem truncum congressi, cum ramo zygomatici descendente masseterico, qui huc usque Stenonianum ductum sequutus erat, confluunt, et non solum celebrem illam anastomosin cum

neruo

neruo infraorbitali rami secundi quinti paris efficiunt, sed etiam cum ramo buccinatorio communicantis faciei in coniunctionem cum ramo buccinatorio rami tertii quinti paris abeunte vniuntur: ex qua vniione dein partim numerosi surculi per ipsum musculum buccinatorem disperguntur, partim labiis anguloque oris copiosissimis neruis filamentis prospicitur, vt egregie a beato MECKELIO annotatum est.

§. 21.

Plexus nerui communicantis faciei venam magnam facialem in ophtalmicam inosculatam ambientes.

De insigni rete neruoso venam temporalem tam mirifice amplectente paullo ante dictum est. Tam grande, et tam copiosis ramis mutuo sibi irretitis, et tam arcte venarum tunicis inhaerens saepe inueni, vt de singulari illius retis neruosi in mutando sanguinis itinere influxu dubitari nequeat.

Luculentius autem ramorum nerueorum communicantis faciei cum vasis sanguiferis circumvolutiones intueri possumus, in observando decursu venae facialis, ab angulo maxillae inferioris usque ad ingressum eius in orbitam. In ipso enim angulo oculi interno, ubi ramulos venosos palpebrales recepit, et pone ligamentum palpebrale incedit, copiosis irretitur surculis neruorum trochlearium cum ramis ex ramo zygomatico et temporali inferiore communicantis faciei vnitis. Manifestiores fiunt illi plexus et reticula, si vena facialis, in sinu isto inter nares, zygoma et maxillam superiorem versus buccas progreditur: Ibi enim per tam intricatum rete neruorum transit, quod ex vniione infraorbitalis et maximae partis zygomatici formatur, vt verbis vix describi possit. Omnium vero maxima et validissima coniunctio fit, dum vena, derelicta maxilla superiore, in vicinia ductus saliualis Stenoniani super buccas versus maxillam inferiorem incedit. Validi nempe surculi ex ramo zygomatico,

matico, cum plurimis ex ramo masseterico duri, aliisque ex ramo inferiore eiusdem cum neruo mentali confluente, et ramis buccinatoriis et massetericis ex ramo tertio quinti, tam ineffabili ratione inter se confluunt et irretiuntur cum vena per illud rete gliscente, ut filamenta neruea pluribus in locis arctissime venam, et ramum arteriae buccalem venae comitem amplectantur et cingant. In hoc etiam loco cum specie veri praecipuam contingere in vasis putamus mutationem, cuius sequela et effectus faciei rubores et paliores sunt, si animi affectibus laboramus.

§. 22.

Plexus circa ductum salivalem Stenonis.

Paucis modo verbis speciatim tangam neruorum circa ductum salivalem Iudentium reticula, phænomeno illo, tam subito saepe aucti vel imminuti salivæ prouentus si nerui afficiuntur, memorabilia facta.

Incipunt iam neruorum filamentula ex ramo temporali et zygomatico prouenientia ductum Stenonis amplecti, dum minores salivalis ductus surculi ex diuersis parotidis locis in communem truncum confluunt. Augentur plexuli illi filis ex rete neruoso elabentibus, quod arteriam transuersalem faciei, mox proprius mox remotius a ductu salivali excurrentem cingit. Progreditur hoc rete cum ductu usque ad locum ubi musculum buccinatorem perforat, et in os aperitur. Ibidem enim cum enarratis nerueorum filorum reticulis ex profundiore loco accedentes irretiuntur surculi mediantibus ramo masseterico et buccinatorio ex ramo tertio quinti orti, quorum partim musculum buccinatorem petunt, partim strictissime ductus salivalis tunicis adhaerent, et in illis finiuntur.

§. 23.

§. 23.

Generalia de nervis cardiacis.

Cum iam limites commentationi academicae, ne in volumen accrescat praescripti, vix permittant, eo ordine quo huc usque usum, etiam magnos nervos oœtaum et intercostalem per magnum quem absoluunt campum in vasorum amplexu persequi, quod proxima commentatione, quae historiae nervorum viscerum abdominallium alteram partem comprehendet, peracturus sum, nunc unicam tantum particulam, *nervorum nempe cardiacorum*, ceu ramorum ex unione utriusque vagi nempe et intercostalis ortorum, ad vasa relationem respicientium cum publico communicabo. Idque eo minus ab instituti mei ratione alienum esse arbitror, quod nouas quasdam contineat obseruationes, ad constituendam et in clariorem lucem ponendam difficillimorum nervorum historiam idoneas.

Quod representationem plexus cardiaci maximus cum difficilem, tum dubiam, naturae minime respondentem, quin falsam et erroneam reddit, sunt numerosissima *vasa lymphatica* glandulis lymphaticis seu congregatis et arteriis remixa, plexum insignem vasorum lymphaticorum cardiacorum formantia, et tandem partim *venae thyroideae mediae* et principio *venae cavae superioris* inserta, partem versus ductum thoracicum migrantia. Oriuntur enim in baseos cordis universo ambitu, praecipue in regione coalescentium finium copiosi vasorum lymphaticorum surculi, qui in intervallo venae cavae superioris, arteriae aortae et tracheae, cum iam plures rami in glandulas congregatas confluxissent, non mediocrem plexum formant. Facile incisor in cognoscendis vasibus lymphaticis inexeritatus in errorem incidere potest, ut vacua et contorta vasa absorbentia pro nervis filis habuerit, dubia inde in figuris exhibita retia enata esse videntur.

H 3

§. 24.

§. 24.

Nerui vasa cordis amplectentes.

Cordi, viscerum vitalium fere principi, multos naturam neruos impertiuisse, facile erat assertu, si perennem huius partis motum a primis foetuum incunabulis ad extremum vitae halitum durantem, actionem eius minime in sanis animantibus interruptam, vigorem, efficaciam, fortitudinemque, qua massam sanguinis propellit, languentem fulcit et sustinet, cestantemque saepe restaurat, consideraueris.

Quamuis equidem nostri temporis industria, HALLERI *q)* vel ANDERSCHII *r)*, et NEUBAUERI *s)* indagandi cupidine incensa, neglectum LOWERI *t)*, LANCISII hos neruos describendi depingendique studium et laborem, a VIEUSSENIO *u)* et WILLISIO *x)* paullo meliorem factum, correxerit, multum tamen abest, omnem hanc disquisitionem plane absolutam, luceque meridiana clariorem redditam esse, ut nihil partim neruorum cardiacorum enodationi in genere, partim eorundem per varias cordis partes distributioni addi possit. Quid quod, ipsa neruorum cardiacorum quantitas minime ita comparata est, ut ex eorum in fibras cordis musculares ipsas dispersione, ad sustinendum tam fortem constantemque motum sufficiat, cui viuidissima huius visceris irritabilitas succurrere omnino debuit. Pro hac neruorum cordis paucitate ac tenuitate, magna adhuc illorum pars cordi ipsi eripitur, vasisque illius impenditur. Paucis itaque observationibus de plexibus neruorum cardiacorum in genere ab aliis,

q) Descriptio anatomica neruorum cordis, nondum promulgata, vel vero quoad picturam, ALBERTI DE HALLER ad figuram neruorum cordis diuinatio in Comm. Soc. Goett. T. II.

r) Descriptio neruorum cardiacorum. Jenae 1772. 4.

s) Tractatus de Corde. Amsterd. 1669. p. 15. seq.

t) De motu cordis et aneurysmatibus. Lugd. Bat. 1740. 4. Tab. VII.

u) Neurographia uniuersalis. Lugd. 1685. fol. Tab. 33.

x) Cerebri neruorumque anatome. Genevae 1680. 4. Tab. IX.

aliis, ANDERSCHIO praecipue et NEUBAUERO cum publico communicatis, quae ortum nerui cardiaci magni concernunt praemissis, subiectemus proprias nostras nouasque cum de maximo neruo cardiaco ganglio longiusculo praedito, tum de neruulis ex plexibus cardiacis vasa cordis amplectentibus obseruationes.

§. 25.

De magno neruo cardiaco dextri lateris ganglio longitudinali instrucio.

Ex iis, quae de neruorum cardiacorum ortu, situ, numero, figura, magnitudine et habitu, tam ex figuris publici iuris factis, quam ex descriptione adiecta collegimus, patet, neminem omnium magni huius cardiaci neruei ganglio praediti quem *trunci* instar considerare possumus, talem in modum mentionem fecisse, qualem mea adumbratio cum verbis tum iconē repraesentat, et qualem quilibet rei cupidus inter mea praeparata cernere potest, quare absque vlla arrogantia et inclarescendi pruritu eum *nouum* appellari debere existimo. Non simplicem varietatem, rariſſime inter plura cadauera vnico tantum exemplo occurrentem esse, repetitae meae in nouem corporibus humanis institutae obseruationes testantur, quorum sex similem ostenderunt fabricam, conformatiōnem, figuram, situm, magnitudinem aliaque: in tribus tantum tam nerui ipsi quam eiusdem ganglion erant teneriores, et vti a NEUBAUERO descripti sunt. Ad faciliorem nerui huius cardiaci maximi et ganglii eidem proprii disquisitionem instituendam, et situm eiusdem securius et certius inveniendum, cor a pericardio nudum, e dextris versus sinistra reclinandum, vena azyga cum vena caua superiore vel descendente quantum fieri potest in sinistrum latus dirigenda, aspera vero arteria fortiter versus dextram thoracis regionem ducenda; hoc modo enascitur cauum oblongum, cuius *inferiorem* marginem formant
ramus

ramus arteriae venaeque pulmonalis, *sinistrum* vena caua superior cum reflexa azygos vena, *dextrum* sinister ramus bronchiorum cum integra asperae arteriae parte inferiore, *superiorem* truncus communis pro arteria carotide et subclavia dextra s. anonyma vel arteria prima, et vena subclavia, in fundo autem huius foueae cernimus superficiem posteriorem arcus aortae vbi arteria prima illa egreditur.

In hac descripta cavitate, si debita encheiresi, cautela et administratione vasorum lymphaticorum plexus et glandulae, cellulosa et adipis particulae remotae fuerunt, intueri possumus insignem hunc neruum ad totam longitudinem in fundo cavitatis s. foueae super arcus arteriae aortae planum posterius versus cor descendere, et in media aortae parte in ganglion suum oblongiusculum intumescere.

§. 26.

Ortus huius magni nerui cardiaci.

Primam eandemque maximam repetit originem *neruus cardiacus maximus* ex crassissimo nerui intercostalis filamento, quod ex ganglio cervicali superiore trunci continuationem format, et super musculo colli longo descendit. Exit nempe ex hoc nerui intercostalis trunco in regione media carotidis cerebralis filamentum nerueum insigne ipso trunco tamen minus, et paullo magis in interiori colli superficie pone carotidem communem descendit, antequam fere locum attigerit, vbi arteria thyreoidea inferior sub carotide transit, neruea radix haec finditur, et paullo post denuo cum altero ramo coit insulam constituens, in cuius ramum alterum interiore inseritur tenerius filamentum ex plexu magno, quem ramuli intercostalis, octaui nonique paris ad exterius pharyngis latus formauerant, alter autem huius fissae radicis ramus exterior exiguum surculum ex trunco intercostalis ipso nanciscitur, nactusque hoc duplex augmentum in elegans sed

sed paruum gangliolum intumescit, in plerisque cadaueribns arteriae thyreoideae inferiori insidens, quod etiam in aliis mox supra mox infra eandem inueni. Ex tenello ganglio quinque surculi plerumque solent exire, duo exigui in tunicas carotidis, tertius maior et satis insignis ad recurrentem, quartus pariter memorabilis in thoracem descendit, et inter arteriam anonymam s. primam et venam thyreoideam infimam neruus cardiacus superficialis fit, quintus vero, omnium maximus, vltierius descendendo progreditur, et in angulo, quem carotis et subclavia dextra includunt, alteram eandemque crassissimam radicem, ex trunco intercostalis prouenientem, secum iungit. Ut alteram nerui cardiaci maximi radicem melius cognoscamus, ratio habenda est progressus nerui intercostalis vsque ad ansam subclavialem.

Edita magna illa radice cardiaci, quam primam appellaui, truncus nerui intercostalis versus thyreoideam inferiorem progreditur, in quo itinere vnicum surculum, quem tertiam radicem nominaui, cardaco dedit, super thyreoideam incedit, eandemque exigua ansa amplectitur, quam format nouum filamentum ex neruo ceruicali sexto accedens, cuius maxima portio cum alio filamento, ex septimo ceruicalium proueniente, gangliolum efficit, ex quo deinceps duo filaments cum trunco intercostalis ipso, et alio filamento a septimo ceruicalium emergente, in ganglion *ceruicale medium* abeunt, thyreoidae inferiori adsidens. Prodeunt ex ganglio ceruicali medio, quod plerumque inter omnia ceruicis ganglia minimum esse solet, in fere omnibus quae examinaui subiectis, tres nerui: *primus* idemque exterior, truncum ipsum intercostalis continuans, super arteriam subclaviam dextram se coniicit, ansam subclavialem format, et in ganglion *ceruicale infimum* transit; *secundus*, qui medius est, et omnium minimus, fit cardiacus superficialis, *tertius* interior maximus, trunci nomine dignior quam primus, radicem nerui cardiaci nostri constituit.

Descriptio nerui cardiaci maximi et ganglii eiusdem.

Magna haec radix, derelicto ganglio, insignem ramulum ex neruulis ceruicalibus superius descriptis, qui paruum gangliolum formauerant, sibi insertum accipit, duo etiam filamenta retro subclauiam in ganglion ceruicale et canalem vertebralem abeuntia emitit, mutataque directione, nunc interiora magis petit, vbi in angulo, quem carotis et subclavia cum arteria prima includunt, trunculum ex prioribus radicibus enatum secum iungit. Ex hac coniunctione neruus cardiacus ad eandem increvit crassitatem et magnitudinem, quin fere maiorem, quam neruus recurrens dextra lateris habet. Sub carotide dextra neruus cardiacus nunc absconditur, ante recurrentem dextrum incedens arteriae primae appressus est. In ipso hoc profundiore retro arteriam primam situ, noua insignis, ex unito ramo qui ex octavo et nono prouenit, radix accedit ad cardiacum: ex ganglio tunc ceruicali infimo, arteriam vertebralem arctissime amplectente, abscedit ramus non mediocris magnitudinis, sequitur vertebralem usque ad originem eius ex subclavia, firmiter eidem appressus, ex trunco cardiaci nerui ipso duo rami transuersaliter illi inferuntur, ut vertebralem arteriam plexus in modum cingant et amplectantur, iunctis dein his neruulis ramus ipse insignis sub angulo acuto ad ortum arteriae subclaviae ex prima, cum trunco cardiaci nerui coniungitur. Truncus cardiaci in ulteriore versus cor progressu integrum rete ex tribus quinque filamentis a recurrente dextro ortum, binis radicibus sibi adsociat. Quo facto nunc tandem ex omnibus radicibus conflatus integer nerui cardiaci truncus profundius in thoracem demergitur, et planum posterius aortae in cauitate superius descripta attingit.

§. 28.

Descriptionis continuatio.

Ab ultimae radicis in cardiacum magnum insertione, vsque ad nouam in minores ramos diuisione, truncus nerui cardiaci maximi ad duorum pollicum et ultra longitudinem laeuis et aequalis incedit. Iam ab illo loco, vbi ultimam radicem ex recurrente accepit, intumescere incipit, ganglion nouum formaturus; imperceptibiliter intumescientia augetur, donec crassissimo et latissimo loco lineae latitudinem et dimidiae crassitatem attigerit.

§. 29.

Nerui cardiaci in ramos distributio.

Ex oblonga hac gangliformi nerui intumescientia diuisio nerui cardiaci in plures ramos contingit, qui omnes in interuallo inter aortae planum posterius, venarum cauarum et pulmonarium sinus, ramum arteriae pulmonaris dextrum et bronchum, cor petunt sequenti ratione.

Primus ramus, omnium maxime *anterior*, cum directio totius nerui cardiaci maximi cum sua intumescientia gangliformi a dextris versus sinistra, in interuallum inter aortam et pulmonarem procedat, in isto interuallo ramo arteriae pulmonaris dextrae incumbit.

Mox post factam a trunco separationem, tenuem emittit surculum, cum paruis aliis ex neruis cardiacis minoribus plexus posterioris prouenientibus irretitum, et per posteriorem arteriae pulmonaris dextrae superficiem tam in tunicas arteriae, quam in bronchum vicinum distributum:

Inclinat dein rami huius primi truncus versus sinistrum arteriae aortae latus, vbi pulmonarem dextram tangit, et copiosa tela cellulosa laxiori inuolutus, quae in plerisque subiectis adipe repletur, versus ortum arteriae aortae, vbi ex ventriculo aortico prodit, decurrit. Ibidem circa principium arteriae coronariae sinistrae et posterioris in plures ramos dehiscit, alii eorum tunicis aortae implantantur, alii iidemque copiosissimi in egregios plexus mutantur, cum arteria coronaria dicta per omnem cordis substantiam, cui haec arteria prospicit, distribuuntur.

Secundus ramus parvus, arteriam pulmonarem dextram petit, et in tunicis eiusdem manet.

Tertius ramus, etiam minoris voluminis, per superficiem posteriorem arteriae aortae in tunicis dispergitur.

Quartus ramus, seu continuatio trunci nerui cardiaci maximi, statim in plures ramos fissus, per dictum inter aortam et pulmonarem arteriam interuallum, versus anterius aortae planum excurrit, et late super illam exspatiatur: Praecipui et validissimi illius rami circa arteriam coronariam dextram seu anteriorem in similes elegantes plexus mutantur, vti de ramo primo respectu alterius coronariae dictum est, et cum ramifications huius arteriae sequantur, mediantibus illis vasorum ramis per alteram cordis dimidiad late disperguntur.

§. 30.

Plexus circa arteriam vertebralem.

Coronidis loco adhuc, donec paratas meas et absolutas obseruationes de neruorum vasa cingentium in reliquis corporis partibus amplexibus publici iuris faciam, insigne vas paucis attingere volo, quod in excitandis animi affectuum sequelis, inter praecipua et efficacissima

cacissima pertinet, nempe arteriam vertebralem. Duo paeprimis loca sunt, vbi non mediocres neruorum rami illam amplectuntur; *Par primum* neruorum ceruicalium ASCHII, et *ansae nerui intercostalis* in regione ganglii ceruicalis infimi, in loco igitur ingressus et egressus, vbi arteria vertebralis canalem vertebralem petit.

De inferiore loco primum dicturus.

Arteriam vertebralem subclavia egredientem varii insignes nerui amplectuntur, antequam canalem suum osseum attingit. a) Continuatio nerui intercostalis ex ganglio ceruicali medio, ansae instar circa arteriam subclaviam recurva, et in ganglion ceruicale infimum abiens: b) c) d) tres fasciculi fortes ex ganglio ceruicali infimo, et cum surculis ex recurrente in plexum cardiacum magnum consumti: e) f) duo minores rami ex ganglio in interuallum quod subclaviae et vertebrali intercedit: g) h) i) tria crassa filamenta ex pari septimo et octavo ceruicalium, et primo dorsalium, ad augendum et amplificandum ganglion ceruicale infimum consumta:

Ex omnibus his neruorum ramis circa ingressum arteriae vertebralis in suum canalem sitis, partim ex uno partim ex altero, semper autem ex tribus vel quatuor eorundem, multi neruorum fasciculi super arteriam sparguntur, quorum irretitiae inter se complicationes in aperto canale facile cerni possunt.

Alteram nerui memorabilis cum arteria vertebrali copulam perficit, paris primi neruorum ceruicalium ill. ASCHII truncus y). Arteria nempe ex foramine processus transuersalis atlantis emergente, et inter occiput et primam vertebram versus foramen magnum occipitis properante, integri paris ASCHII truncus dura

y) Elegantissimam et accuratissimam huins paris cum descriptionem tum picturam exhibuit Vir summus in Diff.

anat. de Primo pare neruorum medullae spinalis. Goett. 1750.

matre medullae spinalis egressus, posteriori arteriae vertebralis superficie arctissime incumbit, et, latae fasciae instar, super dimidiam superficie partem arcuatae arteriae expanditur: Ex ipso iam diuisionis loco, vbi par primum in varios ab ill. ASCHIO enarratos ramos dehiscit, tres vel quatuor tenelli fasciculi per arteriae vertebralis tunicas sparguntur, et cum eadem foramen occipitale ingrediuntur, ut saepe albicantia neruorum fila in arteria basillari distinguerem potuerim.

Si cum his arteriae vertebralis fasciculis comparare volumus, quae carotidi cerebrali, per canalem suum progredienti, ex intercostali, eiusdemque præcipue ganglio ceruicali supremo impertiuntur neruorum propagines, neruorum in has cerebri primarias arterias imperium minime in dubium vocari potest.

HENR.

HENRICI AVG. WRISBERGII
 OBSERVATIONES
 ANATOMICO-MEDICAE
 DE
 NERVIS PHARYNGIS
 PRAELECTAE
 D. II. APR. A. MDCCCLXXXV.

§. I.

Vtilitas et necessitas disquisitionis subtilioris neruorum pharyngis.

Neruorum pharyngis nouas tradituras obseruationes, facile ab iis assensum me impetraturum fore arbitror, qui cum dignitatem quin necessitatem huius disquisitionis perpendunt, tum accuratam, concinnam et completam illius neurologiae partis explanationem in scriptis anatomicorum et physiologorum frustra quaerunt. Obseruantes enim attenta mente deglutitionis rationem, admirabuntur, quanta nempe, imo saepe incredibili, velocitate omnia, siue solida siue fluida fuerint ori ingesta, tam regulariter in oesophagum promouentur, vt nisi muscularum actio ab alia superueniente causa, vt tussi, risu, fletu, voce, sternutatione etc. turbetur, mirabili ordine succedat.

Non

Non sine iusta autem misericordia homines intueri possumus, qui labefactata ex qualicunque causa, siue corpus peregrinum faucibus impactum haereat, siue ex vulnere quodam externo vnus alterue pharyngis neruus affectus fuerit, deglutiendi difficultate laborant, quanta torqueantur anxietate, quantum dolorem patientur, donec remoto impedimento partium libertas restituta est. Similem angorem et inquietudinem in omni anginarum specie obseruamus, praecipue autem in angina tonsillari.

Omnem tandem superant fidem horrenda illa sub spastico hydrophobiae stadio, siue morbu animantis rabidi contaminatus homo fuerit, siue febre acuta maligna et phrenitide laboret, oborta symptomata, anginoideis, si tantum horrorem aquae excipias, cum acutis tum chronicis admodum similia. Haec cum in variis hominibus, praecipue hypochondriacae atque hystericae naturae, nervosis itaque affectibus et quodammodo tumultibus quam maxime pronis, si in febres malignas et phrenitides incident, probabili-
ter analogiam quandam habent cum notis illis colli, pharyngis laryngisque spasticis doloribus, qui in febribus malignis, itidem minori in gradu in anginae quibusdam speciebus, vti nuper in iuene hypochondriaco aegroto expertus sum, deliriorum prodromi esse solent. Propter illam hydrophobiae et quibusdam anginis familiarem summam pharyngis stricturam, dolorem ardoremque, non modo excusandus est JOSEPHUS ab AROMATARIIS cum BOERHAAVIO illi assensum praebente, si rabiem caninam anginoideam faicum inflammationem esse dixerit, sed etiam, non obstante seftione cadauerum, et egregio vomitoriorum in hoc morbo rabioso vsu, satis refutatus nondum est.

Si vltimo denique loco abominabile hydrophobiae proprium symptoma perpendimus, aegros, licet summo potus desiderio flagrent, si gutta tantum aquae linguae partem tetigerit, horren-
das

das illas pharyngis stricturas oriri, ex consensu vagi et accessorii truculentas illas cardialgias et tormina produci, et ex sympathia neruorum faicum, pharyngis, reliquie corporis, vniuersam machinam conuelli, de utilitate et necessitate subtilioris neruorum pharyngis disquisitionis et indaginis persuasi esse poterimus.

Neurologiae studium et cognitio etiam hic multum ad illustrationem et comparationem mali truculentissimi confert, neque vel hoc nomine, quae a quibusdam ignavis hominibus dicuntur vulgo anatomicae subtilitates, decet per ignorantiam contemnere, cum nullibi haec subtilia fatis sint, quae lucem qualemcumque paecludant.

Cum primae huic canalis primarum viarum parti, quam pharyngem appellamus, ex tribus fontibus nerui suppeditentur, ex pari quinto, octavo, et intercostali, in tria itaque capita commode dispesci potest, quod obseruationes et experientia me docuerunt.

CAP. I.

DE NERVIS PHARYNGIS EX QVINTO PARE ORTIS.

§. 2.

Generaliores de neruis pharyngaeis ex quinto pare ortis obseruationes.

Licet haec prima canalis primarum viarum pars, *pharynx* dicta, praecipuos suos neruos ex octavo, seu potius illius portione, *glossopharyngaeo* nanciscatur, sunt tamen omnino in parte pharyngis superiore, a nobis *palatina* a) nuncupata, minime contemnendi ner-
vorum

a) Ut in ampla pharyngis regione curatius determinari possit, in tres par-
ramulorum nerueorum distributio ac-
tes illam dispescere conuenit, *palati-*
K

vorum fasciculi, qui originem ex quarto pare petunt. Referimus
huc praecipue, a) surculos ex *ramo vidiano* rami secundi, b) ramu-
los *nerui palatini* eiusdem fontis, c) ramulum *pharyngatum* rami
tertii, qui in multis subiectis, nisi id iam a *neruo palato-pharyngaeo*
factum fuerit, cum ramo retroflexo ex *glossopharyngaeo* tradito in
unionem abire solet.

§. 3.

Nerui pharyngis ex Vidiano.

Primam omnium pharyngis neruorum originem procul dubio
formant, tenelli illi fasciculi, qui ex *neruo vidiano* in ipso canale b),
numero inconstante, cum duos, tres, modo vnum viderim, musculos
ingrediuntur a tuba eustachiana et alis pterygoideis ortos, sub no-
mine *salpingopharyngaei* et *pterygo-pharyngaei*, cum *cephalophpha-*
ryngaeo altissimam crassae illius tunicae muscularis quae pharyngem
format partem petentes, quam regionem pharyngis palatinam breui-
tatis causa appellamus. Propter duriorem huius regionis naturam,
cartilagini fere similem, praeparatio horum neruorum admodum
difficilis est: conabimur vero aliqualem descriptionem exhibere.

Neruus vidianus, quem b. MECKELIUS tam egregie reprae-
sentauit in suo canale, magnum neruorum fasciculum caudae
equi-

nam, tonillarem, et laryngaeam. Re-
spondent fatis bene receptae distin-
ctioni muscularum pharyngis in con-
strictorem superiorem, medium et in-
feriorem. Quemadmodum vero post
elegantes clar. GAUTIER *Myologie*
complete en couleur. Paris 1746. fol.
max. Tab. IX. beat. ALEINI *Tabulae*
Sceleti et muscular. corp. hum. Lugd.
Bat, 1747. fol. max. Tab. X. J. B**
Traité de la cephalotomie à Avignon

1748. 4. Tab. 15. beat. SANTORINI
Septendecim Tabulae. Parmae 1773.
4. Tab. VI, figuræ vix quidquam
magni momenti de hac parte pingi
potest, ita egregia ill. HAASE *descriptio*
in Myotomiae specimine de muscularis
pharyngis et veli palatini. Lips. 1784.
omnia exhausit.

b) Seceffum horum ramorum bene
expressit ill. SCARPA *Anat. ann. Lib.*
II. Tab. II. Fig. II. 10.

equinæ instar format, arteriam venamque vidianam includentem, qui minimis surculis, arteriolis ciliaribus similibus modo tenerioribus, circa nerum eiusque surculos ludunt: Vti nunc ex neruo vidiano plures surculi cum ad nares, tum ad aquaeductum Fallopii nerum durum continentem, et ad canalem caroticum alegendantur, ita cum ramulis vasorum vidianorum aliquot tenella filamenta paulo post quam rami *nasales superiores posteriores Meckelii* ad vomerem et tubae Eustachii aperturam exierunt, ex eodem principium pharyngis ab osse occipitis etc. proueniens ingrediuntur. Difficile omnino est in crassa et fere cartilaginea substantia qua pharyngis initium cum osse occipitis, petroso et tuba Eustachiana necatur, exiles et molles nerulos praeparare. In subiectis autem, in quibus vasorum repletio cum in arteriis rubra, tum in venis coerulea materia bene successit, si examen instituitur, prouti in duobus ego feci, elegantes anastomoses cernere possumus, quas tenera haec vasa propter repletionem vero visibilia et discernenda, cum ramis vasorum palatinorum formant. Procedunt deinceps cum muscularum fasciculis a tuba Eustachiana sub nomine salpingo-pharyngaei in pharyngem inserti, ad eundem saccum, et imperceptibili tenuitate distribuuntur.

§. 4.

Nervi pharyngis ex ramo palatino quinti secundo, et ex ramo tertio quinti.

Harmonia, et conspirans actio functioque palati et pharyngis ex illa quoque elucescit anatomica obseruatione, quod superiori pharyngis principio, ex uno eodemque insigni rami secundi paris quinti, qui respectu praecipuarum palati partium, quibus prospicit, summo iure *nerus palatinus* appellatur, surculos nerueos non medios obtineat.

Ex ramo nempe palatino posteriore, seu minore, qui vuulae, velo palatino pendulo, itidemque tonsillarum vicinitati, vti etiam *ex neruo palatino exteriore c)*, quem commode *palato-pharyngaeum* appellare possumus, duo vel tres fasciculi ablegantur ad pharyngis partem palatinam, qui per carnes eiusdem distributi, in nonnullis subiectis occurunt aliis furculis ex ramis glossopharyngaei retrocedentibus versus superiora, vt vna, cum vasorum plexu, cum his neruulis in copulam abeunt.

Tertius tandem fons, ex quo pharyngis parti palatinae ramuli neruei subministrantur, est ramus tertius quinti parisi ipse; in verticaliter dissecto capite, par ξ^{tum} a parte interna perquisiui, remouebam itaque omnem posteriorem s. internam partem ossis petrosi, corporisque sphenoidei, dissecui tubam Eustach. et omnes ibidem iacentes musculos cum velo palatino, palato ipso, lingua etc. remoui, relictus mansit musc. pterygoideus. Iam vidi duo tenuissima filamenta neruea trunco rami tertii exire, quorum alter super musc. pterygoideos oblique versus os et velum palatinum progreditur, alter autem versus posteriora inclinans per duriores altissimi pharyngis carnes dispergitur, cum huius ramis denuo anastomoses fiunt cum ramis recurrentibus ex glossopharyngaeo. Mihi non omnino improbabile esse videtur, hanc forsan neruorum copulam insigniuisse ill. COTUNNI, cuius mentionem fecit ill. et exoptatiss. MARTIN d), licet ego nec vniōnem cum septimo pare, nec peculiare gangliolum in illo inuenire potuerim.

CAP.

c) Eleganter repraesentati apud ill. SCARPA T. II. Fig. II. 25. 32.

d) *Institution. Neurologiae. Part. II. p. 36.*

CAP. II.

DE NERVIS PHARYNGIS EX OCTAVO PARE.

§. 5.

*De integra octauis paris neruorum serie
generaliores obseruationes.*

Dudum iam procul dubio oportuisset incisores antiquum dimittere errorem, tres, in tam multis attributis diuersas neruorum series, quae recte momente b. SANTORINO e) incongrue fasces nominantur, sub uno eodemque *octauis* vel *vagi* paris nomine comprehendere. Res vero semper eodem in statu mansit, donec b. ANDERSCH, et secundum mentem meam egregius olim discipulus meus celeb. SOEMMERRING f), ramum *glossopharyngaeum* ab octauo separare inceperint. Id mihi a primis temporibus, quo auditoribus meis fabricam corporis humani ostendere et illustrare debui, naturae conuenientius visum est, cum *neruo glossopharyngaeo*, alteram neruorum classem inchoare, et medullae *par primum* nuncupare, cuius *alterum* deinceps ipse nerui truncus fit, et *tertium* par linguale medium vulgo nonum dictum, quae tria paria, *primum* vniuersae medullae nempe *medullae oblongatae* neruorum ordinem componunt; alter dein ordo continet *neruos ceruicale*s quorum principium est *notissimum* *par primum* ill. ASCHII.

§. 6.

Exitus octauis paris.

Omnis tres fasciculi, vel potius series, nempe *Glossopharyngeus*, *Vagus* et *Accessorius*, qui iuncti iuxta receptum loquendi usum

K 3

inte-

e) *Tabulae Septendec.* pag. 26.

f) *Diff. de basi encephali.* p. 159.

integrum *ostia paris truncum* componunt, intrant sinum illum osseum, inter partem petrosam ossis temporum et os occipitis medium, vel cum vena iugulari communem, vel uti saepissime fit, lingula ossea a fossa iugulari separatum.

Profundum quasi illud ahenum, satis accurate sub foramine meatus auditorii interni, quem auditorius neruus cum communicante faciei intrat, situm est, aliquot lineas saltem inferius, magnitudinis fere eiusdem. Laxa quadam arachnoideae continuatione in patina vel aheno dura matre obducto, cinguntur, ad exitum vero sepe accingentes, hi tres nerui in ipsa hac fouea separantur, et tribus in dura matre fabrefactis canalibus, qui saepe etiam in ossibus seorsim parati sunt cauitate cranii egrediuntur. Melius hoc sene cerni nequit, quam si bini superiores fasciculi, *glossopharyngeus* inquam et *vagus* ab interioribus versus exteriora reclinantur, nitidissime enim sub hac encheiresi oblongum et horizontaliter directum canalem superiorem, quem *glossopharyngaeus* ingreditur, medium eundemque maximum pro *vago* magis verticaliter descendenter, et tertium inferiorem pro *accessorio*, ab initio leni acclivique quodammodo ascensu, deinceps declivi descensu directum cernere possumus. Quemlibet autem nunc iam seorsim considerabimus.

SECT. I.

DE NERVIS PHARYNGIS EX GLOSSOPHARYNGAEO.

§. 7.

Progressus glossopharyngaei, gangliolum petrosum et diuifio eiusdem.

Primus eorum *Glossopharyngaeus* recte appellatus, ex 4. & etiam 6. minoribus fasciculis nerueis coalitus, per canalem suum in dura

dura matre factum descendens, intra caluariam nullum amplius habet cum vago commercium, si apperturam sui canalis semel ingressus est. Cum pone parietem posteriorem et inferiorem cavitatis tympani versus inferiora progrediatur, facile suspicari possumus, anne filamentulum communicans cum neruis auditoriis adesset g); nihil vero deprehendi, quod vlo modo huic opinioni ansam dare posset, id tamen minime infrequens est, in ipso canale filamentum abire, quod principio statim muscularum a styliformi processu orientium impertitur.

Proxime adiacet neruus in *ganglion petrosum* intumescens lateri anteriori venae iugularis internae, cui etiam vnum alterumque tenuem surculum in multis subiectis exhibuisse vidi. Si tegellorum illorum furculorum abientium plures adsunt, *gangliolum illud petrosum*, quod omnino ratione figurae oblongae ganglio ceruicali superiore simile est, non inter minima ganglia referri debet.

Truncus nerui *glossopharyngaei* per canalem suum crano egressus in plerisque subiectis in quinque ramos praecipuos dehiscit, quorum quatuor priores et minores, partim cum ramis ex vago, partim cum neruis mollibus ex intercostali, partim inter se diuersimode cohaerent, omnes autem per pharyngem distribuuntur, quintus idemque maximus, *lingualis* recte dictus, versus linguae radicem procedit. Hanc divisionis rationem in plus quam viginti cadaueribus annotauit: in 7 exemplis in tres ramos secessit, in 4 cadaueribus duos ramos aequalis magnitudinis vidi, vnicum mihi tantum hoc usque obuenit, in quo cum ramus *lingualis* iam altiore in loco

in

g) Beat. ANDERSCH lib. cit. §. 3. p. 4. de ramo ascendentे auris internae, et ganglio petroso ex hoc neruo glossopharyngaeo (ipso oītauō neruo capitis) loquitur, fateri autem debo me quidem tenerrima filamenta albicantia, ex

canale membranaceo huius nervi parieti auris internae adhaerentia vidifle, quae vero potius pro fibris durae matris, quam neruorum habenda esse arbitror.

in ramos suos musculares, pharyngaeos et linguaes diuisus esset, octo ramos maiores aliquotque minores numerare potuerim, et sub hac varietate vidi, ramulum unum vel alterum cum neruulis ex classe mollium copulatum, in plexum cardiacum descendisse, non absolute constans esse puto, in omnibus hominibus altissimam neruorum cardiacorum originem ex glossopharyngaeo repetendam esse.

§. 8.

Ramus communicans primus.

Primus constans et perpetuus ramus, etiam ratione magnitudinis sua attentione et appellatione dignus est *communicans primus glossopharyngaei*, cum ramo pharyngaeo ex *vago* plerumque ex infima ganglii extremitate egreditur, et in variis subiectis surculum *communicatorium*, vti b. ANDERSCH illum appellat, in truncum vagi abire vidi: minimo vero constans est, nam in aliis cadaueribus humanis, etiam in cane, in quo animantium genere neruus glossopharyngaeus admodum grandis esse solet, illum ramulum non inveni. Crassiusculus quidem hic ramus est, sed reliquis breuior, praeter tenerrimos binos surculos, cum neruis mollibus ex intercostali confluentes, recta via descendit ad latus exterius arteriae carotidis, et cum ramo pharyngaeo ex *vago* in latere exteriore huius rami confluit, et notabile voluminis augmentum huic ramo affert, ex quo confluxus loco dein plures per pharyngem nerui distribuuntur, de quibus occasione rami pharyngaei ex *vago* sermo erit.

§. 9.

Secundus glossopharyngaei ramus muscularis.

Secundus ramus Muscularis a me dictus, quoniam praecipue stylohyoideo et biuentri prospicit, priori ratione magnitudinis similis, ex eodem fere loco ortus, paullo magis versus exteriora dirigitur.

gitur. In molli et mucoso cellulari contextu, qui musculos a styloformi processu prouenientes, cum carotide et vena iugulari necit, a ramo communicante primo, quocum adhuc neciebatur, secedit, et versus exteriora paulisper decurrit, statimque ramosus fit; minorum surculorum alii pariter cum nерuis mollibus iunguntur, et reti vasorum pharyngaeorum immixti, superiorem pharyngis regionem attingunt, ibidemque finiuntur, et anastomoses supra notatas efficiunt: maxima autem portio partim in musculum stylohyoideum, partim in musculum digastricum distribuitur. Interim tamen notandum est casus occurere, in quibus vel digastricus, vel stylohyoideus hunc ramum solus absunit, frequentius vero per utrumque dispergitur.

§. 10.

Ramus communicans secundus.

Tertius ramus satis accurate iterum *communicans* idemque *secundus* cum ramo pharyngaeo ex vago appellari potest. Cum quarto ramo parili ratione aliquantulum cohaeret, ut primus et secundus ramus cohaeserant. Excepto ramo *quinto* s. *linguali*, qui trunci glossopharyngaei ut continuatio ita et finis est, hic ramus tertius reliquos ramos magnitudine superat. Paullo magis declivi descensu versus anteriora dirigitur, admodum inconstans vero est ratione divisionis, licet summam naturae constantiam respectu finis observauerim. In multis, et afferere auderem in plurimis subiectis, absque omni alio ramo edito versus ramum pharyngaeum superiorem ex vago properat, et in medium huius rami circiter partem paulo exterius in illum abit, illo praecise in loco, ubi ex eodem ramo pharyngaeo superiore praecipuus ramus pharyngaeus inferior seu radix eiusdem exit. In aliis duo, tres, quin quatuor parui surculi abeunt, et pharyngis regionem tonsillarem attingunt, factis

L

nonnul-

nonnullis anastomosibus cum proprio *ramo tonsillari* seu quarto ex trunko glossopharyngaei: et editis his furculis deinceps cum ramo pharyngaeo superiore ex vago, vti superius dictum est, coalescit.

Ramus tonsillaris.

§. II.

Quartus ramus constans quidem, sed omnium minimus, satis conuenienter *tonsillaris* dicitur, cum praecipue vel solus, vel cum aliis remixtus, ambitum pharyngis tonsillarem petat. Emissis aliquot exiguis furculis in musculum stylopharyngaeum, ramus ipse versus ramum pharyngaeum superiore ex vago inclinat, et in binos ramos dehiscit, *alter minor* reuera ramo pharyngaeo inseritur, seu potius nacta ex ramo pharyngaeo superiore, eiusdemque ganglio radice, in alium ramum *tonsillarem interiorem* increscit, et dum retro venam pharyngaeam eiusque ramos tonsillares incedit, cum alter maior ramus tonsillaris exterius ante venam proceſſerit, in plures ramulos inconstantis numeri diuiditur, qui omnes in pharyngis regionem tonsillarem distribuuntur. Egregium sane spectaculum est, frequentes illas anastomoses intueri, quas hi ramuli, reti venoso pharyngo-tonſillari impliciti, partim cum ramo tonsillari exteriore, partim cum ramulis recurvis, ex ramo pharyngaeo superiori vagi versus alteriorem pharyngis regionem ascendentibus formant. *Alter ramus maior tonsillaris* proprie dictus exterior inter musculum stylopharyngaeum et rete venarum pharyngo-tonſillarium in exteriore latere decurrit, et vbi venam tonsillarem magnam tangit, cum furculo ex tonsillari ramo minore et interiore elegan-tem ansam format, qua ipsam venam amplectitur et fulcit. Nunc statim multi ramusculi exeunt in regione tonsillari pharyngis, cum furculis superius descriptis vnti, et multiplicibus ansis et anastomosibus cum venis irretiti, maximus horum ramorum paullo magis a regione tonsillari deflectit, et per fibras tunicae muscularis pharyngis

ryngis repetitis divisionibus sparguntur, quae sub nomine glossopharyngaei, hyopharyngaei etc. notae sunt. Infinitis ibidem cohaeret anastomosibus cum ramulis ex pharyngaeo superiore vagi factis.

Copiosis illis neruorum cum vasis sanguiferis copulationibus, et in genere magno neruorum per regionem tonsillarem pharyngis regionem distributorum numero, vehementia dolorum et symptomatum, si hae partes affectae sunt, adscribenda est.

§. 12.

Ramus glossopharyngaei lingualis.

Quintus ramus, ratione partis cui prospicit, *lingualis* commode dictus, est vera trunci continuatio et finis, quatuor prioribus ramis longe maior. Exeunt ramo, antequam ductu musculi stylopharyngaei versus pharyngis regionem tonsillarem et linguae radicem progreditur, tres, interdum plures parui et exiles surculi in pharyngis partem palatinam, ibidemque distinctis anastomosibus cum ramulis rami descendenter duri, subcutaneis rami tertii quinti, et cum surculis subcutaneis ex plexu ceruicali coeunt.

Dein cum musculo stylopharyngaeo pharyngem et linguam attingit: in eo itinere duo exiles sed constantes, surculi musculum quodammodo includentes, trunco exeunt, qui per pharyngis regionem tonsillarem distribuuntur, et cum tonsillaribus neruulis antea descriptis multiplici ratione vniuntur. Nunc demergit se truncus ipse in carnes musculi stylopharyngaei, et in fissura, quae musculum in duas portiones diuidit, versus linguae radicem excurrit, et in plures ramulos incerti numeri dispescitur, plerumque sex numeraui, quorum duo maiores et parvus, pharyngis illi tonsillari parti imperitiuntur, quae super epiglottidem est: minimis filis ad interiorem

tunicam porriguntur, et cum tonsillaribus, et pharyngaeis superioribus ex vago, multifarie communicant. Duo maiores vero, qui saepe tertium minorem surculum medium, ex uno alteroue maiore saepe orientem includunt, soli linguam petunt. Natura ipsa duce hi duo rami linguaes a se inuicem distinguuntur.

Alter nempe minor et superior commode sublimis et superficialis nominandus optime ab ill. MONRO h) iconе repreaesentatus. Denominationi decursus ratio perfecte respondet, nam inter linguæ integumenta, et partem muscularē lateraliter et superficialiter incedit, in multos surculos diuisus, quorum validiores posteriores, cum neruulis tonsillaribus adhuc communicant, anteriores autem ultra medianam dorsi partem procedentes, in papillis, linguæ marginem obſidentibus, finiuntur. Ab hoc ramo deriuari posse arbitror deglutiendi difficultatem, qua afficiuntur, quibus aphtae dolentes latera linguæ occupant.

Alter maior ramus profundus, quadammodo muscularis dicendus, in profundiores linguæ partes sese demergit, et in plures minores ramulos diuisus, per muscularæ linguæ fibras dispergitur.

SECT. II.

DE NERVIS PHARYNGAEIS EX VAGO.

§. 13.

*Egressus nerui vagi et nerui inde prodeuentes
communicatorii.*

Neruus vagus semper fibrillatim, vel 6. 7 vel 8. 9. 10 fasciculis tenellis parallelo ordine sibi accumbentibus ex medullae oblonga-

*h) Observations on the structure and functions of the nervous system.
Edinb. 1783. Tab. 26. M.*

longatae loco cognito ortus, et molli lanugine ex arachnoidea investitus, versus medium foramen vel canalem in foramine lacero sibi destinatum dura matre cinctum progreditur. Ibidem satis constanter insignem filamentorum nerueorum fasciculum, accessorio ex medulla spinali saepe maiorem, per peculiarem in dura matre haerentem canaliculum, cum nero *accessorio* Willisi per propium canalem descendantem, coniungit. Huic primo ramo communicatorio, vti et secundo et plexiformi filamentorum eorum inter se nexui, et magnae trunci accessorii ipsius cum secundo et tertio pare neruorum ceruicalium ope ansae anastomosi, adscribenda esse arbitror symptomata aliquoties a me obseruata, vt ex vulnere, quod musculum trapezium illo in loco penetrauit, vbi nerus accessorius per eundem distribuitur, ab ipso laesionis momento loquendi difficultas enata, et per reliquam vitam superstitem in balbutiem mutata fuerit: qui porro graui in cucullari, splenio, et sterno-claideo mastoideo afficiuntur rheumatismo, loquelae difficultatem, ventriculi molestiam, et in genere in omnibus visceribus aduersam sentient valetudinem, quae ex vago neruis prospiciuntur.

§. 14.

Continuatio eiusdem argumenti.

Edito fasciculo communicatorio dicto, truncus nerui vagi tres circiter lineas in suo canali membranaceo, a vicino, qui accessorium continet, plane diuerso, versus exitum ex foramine lacero progreditur, venae iugulari proxime incumbens, ita quidem, vt anterius habeat canalem glossopharyngaei, posterius et inferius accessorii; venam iugularem autem in fossa ipsa inter glossopharyngaeum et vagum, medium locum occupasse, vti cel. MARTIN i) afferuit, ego nunquam vidi. Mox in margine inferiore foraminis

L 3

laceri,

i) *De Neruis T. II. p. 117.*

laceri, neruo vago ex canale suo infra caput in collo comparenti, manifestissime denuo ad sociatur insignis neruorum ramus ex accessorio ortus, et per peculiarem canalem membranaceum versus vagum properat, illique sub angulo acutissimo in parte posteriore immittitur. Appellare possumus hunc ramum *communicantem secundum*, et sicut quodammodo alteram radicem, scilicet alterum nerui vagi crus ex medulla spinali ad illum augendum accedens. Minor licet sit hic ramus communicante primo, apparet tamem exinde, partes, quae ex uno alteroque neruorum trunco ramos sortiuntur, sub diuersis rerum conditionibus consensum sustinere, et medici chirurgique attentionem practicam requirere.

§. 15.

Progressus nerui vagi in collo.

Cum nerui vagi truncus extra fossam iugularem integer et indiuisus comparuerit, nam in plus quam 500 cadaueribus, in quibus neruum vagum in regione colli lustrauit, unicum tantum varietatis exemplum vidi, *truncum vagi bifidum fuisse in dextro latere*, qui super arteriam anonymam in unum denuo coalescerent, usque ad originem rami *pharyngaei* superioris in plurimis subiectis ad longitudinem integri pollicis et ultra nullum memorabilem surculum emittit, forti cellulosa venae iugulari adhaeret, et neruo hypoglosso vel nono pari, qui facto arcu oblique ante illum versus linguam procedit. In quibusdam autem indiuis omnino animadvertisi, duos vel tres tenellos surculos super ramum pharyngaeum trunco exiisse, unum cum nono pare, duos reliquos cum ganglio ceruicali superiore ex intercostali coiuisse, unumque vel alterum filamentum in plexum cardiacum misisse.

Ramus itaque *pharyngaeus*, bene ab HALLERO ita appellatus, inter ramos vagi ullius dignitatis primus est. Ex trunco prodit plerumque illo in loco, ubi nonum par ante illum incedit, et ipse ramus

ramus aliquantisper ab hypoglosso neruo obtegitur. Vel iam paullo prius recepit in plerisque cadaueribus vnum alterumque filamentum ab accessorio, bene a b. LOBSTEINIO ¹⁾ animaduersum.

§. 16.

Ramus pharyngaeus ex vago.

Insignis hic ramus *pharyngaeus* cum ratione magnitudinis, tum respectu usus et multiplicis cum aliis partibus copulationis, praecipue autem propter egregium ganglion quod format, inter celebriores vagi nerui ramos pertinet. Descriptionibus iisdemque satis prolixis de hoc ramo equidem non caremus, licet huic prolixitati faepius molestae, perspicuitas cedere debuit, quod praecipue in ANDERSCHII enarratione desideramus, picturam autem fidelem, exactam et rei consentaneam nullibi deprehendo. Ab ortu ex trunco suo vagi per aliquot lineas progreditur ramus *pharyngaeus* indivisus, rarius enim est obseruatio, in unico modo subiecto a me facta, tum ex neruo ceruicali secundo, tum ex ganglio primo intercostalis surculum in eum abiisse, et filamentulum ad plexum cardiacum descendisse.

Dum leni arcu versus pharyngem inclinat, superius approximatum sibi ramum communicantem primum ex glossopharyngaeo recipit, et inde crassior, deorsum vero plerumque duos, saepe tres, quatuor, rarius unicum modo surculum versus ganglion ceruicale superius nerui intercostalis mittit, qui vel seorsim absque coalitu in maiores surculos, quod frequentissimum, vel in maiores coaliti totidem surculis ex ganglio occurunt, et hoc modo anastomoses formant, ex quibus dein vnum alterumque filamentum in plexum cardiacum consumitur.

§. 17.

¹⁾ Diff. de neruo spin. p. 32.

§. 17.

Divisio rami pharyngaei ex oœiauo et ganglion pharyngaeum.

Nunc vterius facto versus anteriora progressu fibrae nerui parumper a se inuicem diducuntur vt latefcat, nonnullis earum fibra rum pauxillum versus inferiora inclinantibus. In superiorem marginem et aliquantulum anteriorem recipit iam ramum communicantem secundum ex glosso-pharyngaeo, quo recepto ramus noster in nodolum *ganglio* vero perfecte similem *pharyngaeum* commode appellandum intumescit. In hoc nerui loco, vbi *ganglion pharyngaeum* format, quinque neruorum rami confluunt et vniuntur, qui partim ingrediuntur, partim exeunt: 1) primus ramus idemque maximus est continuatio rami pharyngaei: 2) secundus ramus est communicans alter ex glosso-pharyngaeo pariter insignis: 3) tertius est annula illa communicans ex ramo tonsillari glossopharyngaei: 4) quartus est continuatio rami pharyngaei versus pharyngem ipsum: et 5) quintus est grandis ramus descendens versus neruos pharyngaeos ex intercostali.

In centro quinque horum ramorum enarratorum confluentium locatum est nostrum *ganglion pharyngaeum*, ratione figurae stellam refert, tot radiis instructam, quot ramuli neruei in illud coalescunt, respectu magnitudinis gangliis mediae classis simile, vti renale ganglion fere, maius certe ophthalmico in orbita.

§. 18.

Continuatio diuisionis.

Diuiditur nunc ramus pharyngaeus facto ganglio in duos ramos, quorum alter paullo *minor* horizontalis, totus quantus in pharyngis regionem trachealem impenditur, alter *maior* descendens, cum ramis ex ganglio ceruicali superiore prouenientibus in nouos ramos coale-

coalescit. Minor vel horizontalis pone venam pharyngaeam incedit, et ubi pharyngem attigit, in 4 ramulos dehiscit, quorum bini superiores adhuc in pharyngis regionem tonsillarem abeunt, et infinitis anastomosibus cum tonsillaribus neruis ex glossopharyngaeo communicant: bini inferiores autem magis descendunt, et multis surculis per pharyngis regionem trachealem disseminantur, ex quibus 5, cum totidem surculis ex pharyngaeo inferiore, versus superiora reflexis, in egregios arcus coeunt, ex quorum margine conuexo infinita copia filorum nerueorum per musculos thyreo- et cricopharyngaeos distribuitur.

Ramus maior descendens breuior quidem praecedente sed crassior mox denuo in duos dehiscit ramulos, quorum *longior* et *tenerior* cum alio ramo ex intercostali prodeunte in neruum pharyngaeum inferiorem coalescit, *breuior* autem ramus partim in ramum laryngaeum superiorem abit, partim cum intercostalibus miscetur. Bint autem hi rami ope ansae cohaerent, quae arteriam plerumque pharyngaeam transmittit.

§. 19.

Ramus pharyngaeus inferior ex vago.

Ramus *longior* et *tenerior* reuera primam radicem nerui *pharyngaei inferioris* sistit, quae cum altera et tertia radice ex ganglio ceruicali superiore singularem ramum format, quem *pharyngaeum inferiorem* appellare possumus, cum *vago*, tum *intercostali communem*, ex binis itaque fontibus ortum. Quicquid de hoc ramo ad neruum *intercostale* pertinet, ut maxima pars, occasione huius fontis enarretur, nunc modo ultimam portionem absoluemus, quae ex *vago pharyngi* exhibetur.

M

Facta

Facta igitur cum ramo ex intercostali circa arteriam pharyngaeam ansa, ramus hic ad pharyngem procedens paullisper versus inferiora declinat: assumit in progressu ex ramo intercostalis mediocrem surculum, quo sibi iuncto paullo post in duos ramos diuiditur, inferior in ramum pharyngaeum ex intercostali abit, superior statim versus pharyngis regionem trachealem excurrit, et infra cornu ossis hyoidis per pharyngis fibras musculares, ex cartilagine thyreoidea ortas, distribuitur, ab inferioribus versus superiora leuiter reflexus, vbi elegantes supra memoratos arcus format, quibus ramuli pharyngaei superioris ex vago cum his vniuntur.

SECT. III.

DE NERVIS PHARYNGIS AB ACCESSORIO
SVPPEDITATIS.

§. 20

Generalia de relatione nerui accessorii ad pharyngem.

Paucos modo pharyngi exhibet *neruus spinalis ad vagum accessorius* surculos, nec quidem immediate ad illum progrediuntur, eamque igitur ob caussam tanquam praecipuus neruorum pharyngaeorum fons speciatim de illo differere non opus esset. Interim cum hic neruus propter constantem cum faucibus organisque vocis et deglutitionis consensum, tot symptomatibus et phaenomenis manifestum, in plerasque harum partium actiones tam in sano, quam in morbo statu influxum habeat, et in descriptione huius nerui Lobsteiniana, quam fere omnes post eum sequuti sunt, et fere excrisperunt, varia occurrant emendationem poscentia, nouam illius quoad decursum imaginem, a natura depromtam, minime superfluam esse arbitratus sum.

§. 21.

§. 21.

Divisio nerui accessorii.

Neruus accessorius, factis cum vago intra canalem membranaceum copulationibus, nunc extra canalem comparens, venae iugularis superficie interiori et paullo posteriori arctissime adhaeret, et ante neruum noni paris incedit, ut ita medium locum inter venam iugularem et neruum nonum occupet. Si hunc situm optime cernere volumus, praeparatio, non vti plerumque a Lobstenio, aliisque administrata fuit, ab exteriore colli latere inchoanda, sed in capitis dimidio, verticaliter secti, ab interioribus versus exteriora progreendiendo perficienda est. Opus quoque est, ut examen vel in subiecto instituatur, cuius venae materia ceracea non repletae fuere, vel, si hoc factum est, vena iugularis euacuanda, ut in planitiem expandi possit. Mox infra nerui egressum, truncus quatuor vel quinque filamenta diuersae crassitie emittit, quorum duo vel tria crassiora cum ramis pharyngaeis ex glossopharyngaeo confluunt: vnum cum filamento ex pari primo neruorum ceruicalium ASCHII versus superiora ascendeante confluit, et cum surculis ex nono et intercostali accendentibus, in longe pluribus subiectis in egregium gangliolum confluit: ultimum, si 4 fuerint, vel duo si 5 cum neruis mollibus vniuntur.

His surculis exhibitis truncus accessorii in plerisque subiectis absque omni alio ramo dato versus coniunctionem cum neruis ceruicalibus properat. Cum nunc inter musculum longissimum et venam iugularem descenderit, circa vertebram colli secundam truncus accessorii in duos ramos dehiscit, quorum posterior *ramus communicans*, anterior *ramus muscularis* dici potest. *Ramus communicans* denuo statim diuiditur: altera et prima portio, duabus fasciculis grandibus cum ansa inter par ceruicalium secundum et tertium media confluit.

M 2

Reliqua

Reliqua, eademque maior portio, siue musculum sternomastoideum siue cleidomastoideum perforauerit, quod in multis contingit, siue illum plane non tangat, versus colli scapulaeque musculos excurrit, et pluribus filamentis per trapezium et cutem distributis finitur. Alter ramus, quem muscularē dixi, nacta et data radice ex paruorum ceruicalium tertio, in multos ramulos diuisus, per musculos sterno- et cleidomastoideos distribuitur.

§. 22.

Consensus inter varias partes ope huius nerui enascens.

Memorabilis omnino neruus est hic descriptus *spinalis ad vagum accessoriū*, causa et instrumentum adminiculans multorum phaenomenorum, ex coniunctione et consensu eius cum glossopharyngaeo, et per hunc cum quinto pare encephali, vago, intercostali et cervicalium plurimorum pendentium, in morbosis praecipue affectibus saepe animaduertendorum. Nostrum equidem non in praesenti est, saltem a scopo meo iam alienum, omnes enarrare affectus, qui ex consensu neruorum huius regionis, cum neruis per thoracem, abdomen, et peluim distributis oriri queunt, in qua re prudentes viri REGA, KAW-BOERHAAVE, HALLER, LANGHANS, TISSOT, RAHN, multique alii plurimum fecerunt.

Addere modo horum virorum veritati pauca philosophumena volui, quae practicum seu potius therapeuticum me docuit exercitium.

1) Notum omnibus medicis practicis est phaenomenon, insolitum stuporem et rigorem in mouenda scapula et brachio sentiri, si affectus catharrhalis in veram anginam transfire videtur.

2) In

2) In veris anginis, aut sub symptomate anginode in hydrophobia, procul dubio consensualis est ex infimo ventre specifice spastica stricatura, neruis pharyngis, laryngis, accessorioque communicata, cum viderim, inter has conuulsiones, insolito more attollendo deprimendoque vicissim scapulas moueri, interdum adeo rigidas et immobiles esse.

3) Si ebrietatis effectus, praecipue ex vinis austenis et mangonisatis obseruamus, saepius singularem scapularum inertiam apprehendimus.

4) Vidi nuper in vxore centurionis vehementis conuulsionis ex cardialgia hysterica enatae exemplum.

Propter motum peristalticum, lento modo versus oesophagum directum, omnis bilis et succus pancreaticus ex duodeno in ventriculum retrocedebant, quoties sufficiens faburrae copia ventriculum repleret, spastica faucium conuulsio enascebatur, rigor et immobilitas scapularum tanta erat, vt eleuare corpus nequiret, et singularis durities in sternomastoideo oriretur, subueniente vomitu, omnia cessabant.

5) In deplorabili illo seminarum hysteriarum statu, si impedimentum in qualicunque tractus intestinalis parte oboritur, quo minus liquores intestinales, vt succus gastricus, pancreaticus et bilis non bene descendant, quod frequentius in ieuni principio fit, a mesocolo transuerso constricto, vehementissimi dolores conuulsui in ventriculo, oesophago, et pharynge oriuntur, ex quibus consensualiter colli scapularumque musculi simul afficiuntur.

CAP. III.

DE NERVIS PHARYNGIS EX INTERCOSTALI
PROVENIENTIBVS.

§. 23.

De relatione nerui intercostalis ad pharyngem.

Neruus ille corporis animalis mixtus, qui ex pare neruorum encephali quinto et sexto ^{l)}, et quoad maximam partem ex medulla spinali ^{m)} prodit, et qui partim *intercostalis*, nomine licet maxime incongruo, attamen frequentissimo et omnibus cognito, partim *sympathetici maximi* a WINSLOWIO praecipue adhibito, et quoad usum et functionem praecipue commendabili, notus est, pharyngem equidem non pluribus munit neruis, attamen illum minime intactum relinquit.

Numerus et magnitudo ramorum pharyngaeorum ex intercostali illis omnino minor et inferior est ex glossopharyngaeo exhibitorum, dum teneri modo illi surculi ex ordine neruorum mollium, et proprii pharyngaei exinde prodeant, nihilominus autem in explicandis variis phenomenis, propter consensum nerui intercostalis cum tot aliis, et toto fere neruoso systemate magni omnino momenti censendi sunt.

§. 24.

*Nerui pharyngaei ex classe neruorum mollium nerui
intercostalis.*

Oriuntur proxime nerui pharyngis ex classe *neruorum mollium* supra ganglion ceruicale superius, statim ab egressu nerui intercostalis

^{l)} Evidentissime euicta est origo dicta a beat. MECKELIO *Diff. cit. et clar. HIRSCH.*

^{m)} DEMETRIUS IWANOFF. *de origine neruorum intercostalium.* Argent. 1780.

stalis ex canale carotico. Non exiguum numerum sifunt, nec inter minima pertinent filamenta quorum constantem per pharyngis tunicas distributionem iam b. HALLERUS agnouit. Interim tamen in his ipsis filamentis multum varietatis et inconstantiae subrepit.

Si iunctae radices ex neruo vidiano quinti, et vna vel altera sexti paris per canalem caroticum delapse in collo in conspectum prodeunt, et truncum nerui intercostalis efficiunt, inter carotidem cerebralem, et crassum neruorum, glossopharyngaei vagi et accessorii fasciculum tenaci cellulosee immersus iacet. Ex ipso hoc coalito trunco, antequam ex vlo neruorum colli radices accessoriae nascutus fuerit, vidi in 7 cadaueribus tria, vel quatuor filamenta, in 2 subiectis unicum surculum in regionem pharyngis palatinam distribui. Incidunt haec filaments pharyngaea inter neruum glossopharyngaeum eiusque ramos et arteriam carotidem, cum nonnullis glossopharyngaei ramis communicant, et fere cum omnibus arteriae pharyngaeae ascendentis ramificationibus per pharyngis superiorem regionem distribuuntur.

§. 25.

*Nerui pharyngaei ex ganglio ceruicali nerui intercostalis,
superior et inferior.*

De radice accessoria quae ex ganglio ceruicali superiore ad neruum pharyngaeum ex octavo accedit, iam superius dictum est; Praeter hanc duo adhuc magni fasciculi neruei, *pharyngaei intercostalis* appellandi, ganglio ceruicali superiore exeunt pharyngi impertiti.

Alter

Alter superior idemque maior factis per tenella fila cum pharyngaeo ex octauo anastomosibus infra cornu cartilaginis thyreoidis superius pharyngem petit, et pluribus diuisionibus et subdiuisionibus perpeffis super pharyngis partem laryngaeam seu trachealem dispergitur.

Alter inferior s. minor, ex infima ganglii parte egressus in duos finditur ramos, quorum superior infimae pharyngis parti impeditur, inferior maior, rami ipsius continuatio vasis thyreoideis superioribus se adiungit, et multiplici ratione iisdem irretitus finitur.
